

MESYUARAT PERTAMA, PENGGAL KEEMPAT
PARLIMEN KEEMPAT BELAS
2021

HARI RABU : 22 SEPTEMBER 2021

KANDUNGAN

JAWAPAN-JAWAPAN BAGI PERTANYAAN-PERTANYAAN JAWAB

LISAN YANG TIDAK DIJAWAB DI DALAM DEWAN

(SOALAN NO. 9, 10 HINGGA NO. 77)

**[SOALAN NO 9 DIJAWAB BERSEKALI DENGAN
SOALAN NO 49]**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : TUAN ABDUL LATIF BIN ABDUL RAHMAN
[KUALA KRAI]**

TARIKH : 22 SEPTEMBER 2021 (RABU)

SOALAN

TUAN ABDUL LATIFF BIN ABDUL RAHMAN [KUALA KRAI] minta **MENTERI SUMBER MANUSIA** menyatakan langkah yang paling efektif dan holistik bagi menangani kes-kes pengangguran dalam kalangan rakyat dan sejauh mana persediaan Kerajaan menangani impak jumlah pengangguran yang semakin meningkat menjelang tahun 2022.

JAWAPAN

Tuan Yang Di Pertua,

Saya mohon izin untuk terlebih dahulu menjelaskan fungsi dan peranan Kementerian Sumber Manusia sebelum menjawab soalan daripada YB Kuala Krai bersekali dengan soalan nombor 49 (22 September 2021) berkaitan isu pengangguran daripada YB Bukit Gelugor.

Untuk makluman Dewan Yang Mulia, Kementerian Sumber Manusia diberi tanggungjawab menjaga hal-hal berkaitan pekerja dan majikan seperti keselamatan sosial (Contoh, skim-skim insuran PERKESO); hak dan kebajikan pihak pekerja dan majikan di mana kementerian mewujudkan undang-undang/peraturan/akta serta platform rundingan antara majikan dan pekerja dan menyelesaikan pertikaian perburuhan di Mahkamah Perindustrian; keselamatan dan kesihatan di tempat kerja (Contoh penyediaan prosedur operasi standard – SOP dan kod etika di tempat kerja); isu-isu berkaitan gaji seperti penetapan gaji minimum. Oleh yang demikian, dengan hormatnya ingin saya tegaskan bahawa Kementerian Sumber Manusia tidak terlibat secara langsung dalam menjana pekerjaan dan mewujudkan peluang pekerjaan baharu. Namun Kementerian Sumber Manusia bersama kementerian-kementerian lain menggembelng idea dan tenaga bagi membantu negara menangani isu-isu pengangguran seperti *reskilling* dan *upskilling* sumber manusia negara khususnya di sepanjang tempoh pandemik Covid-19 ini.

Tuan Yang Di Pertua,

Sekarang izinkan saya menjawab pertanyaan daripada YB Kuala Krai dan YB Bukit Gelugor berkaitan isu pengangguran.

Berdasarkan data terkini kaji selidik Tenaga Buruh oleh Jabatan Perangkaan Malaysia, kadar pengangguran rakyat Malaysia menurun **0.3 peratus daripada 5.1 peratus pada suku kedua tahun 2020 kepada 4.8 peratus** pada suku kedua 2021.

SOALAN NO : 9

Data MyFutureJobs yang diperoleh sehingga September 2021 mencatatkan sejumlah 1,574,327 peluang pekerjaan pelbagai kategori disediakan di dalam portal tersebut. Manakala, seramai 636,613 orang pencari kerja sedang mencari pekerjaan di mana daripada jumlah tersebut seramai 217,356 individu telah berjaya mendapat padanan pekerjaan.

Dalam mendepani situasi ini, Kerajaan telah mengumumkan pelaksanaan pelbagai program bantuan dan pakej rangsangan sejak pandemik COVID-19 melanda negara. Antaranya adalah melalui pakej bantuan tambahan iaitu PERMAI, PEMERKASA dan PEMERKASA Tambahan serta PEMULIH bertujuan untuk memberikan bantuan menyeluruh kepada rakyat dan seterusnya mengekalkan pekerjaan.

Dalam usaha untuk membantu mereka yang kehilangan pekerjaan dan juga sumber pendapatan, Kerajaan telah memperluaskan Elaun Mencari Pekerjaan kepada bukan pencarum PERKESO terutamanya graduan baharu, lepasan sekolah dan pekerja sektor tidak formal. Elaun sekurang-kurangnya RM300 diterima apabila mereka mendaftar dibawah platform MyFutureJobs.

Kerajaan juga telah memperluaskan skop insentif pengambilan pekerja untuk meliputi pekerjaan sementara dan pekerjaan *gig* oleh PERKESO iaitu:

- (i) menyediakan peruntukan RM300 juta yang akan memanfaatkan 60,000 pekerja, di mana setiap pekerja akan menerima RM600 sebulan selama tempoh maksimum enam (6) bulan; dan
- (ii) bagi majikan yang menawarkan pekerjaan jangka pendek ataupun platform penyedia perkhidmatan *gig* yang berdaftar dengan PERKESO, mereka akan menerima RM200 bagi setiap pekerja yang ditempatkan.

SOALAN NO : 9

Selain itu, sejumlah RM125 juta diperuntukkan untuk melaksanakan inisiatif Place and Train di bawah Program Janapreneur HRDCorp terutama kepada belia lepasan sekolah dan graduan. Inisiatif ini akan membuka peluang kepada 30 ribu orang untuk mengikuti program latihan dengan jaminan pekerjaan setelah tamat latihan.

Selain pekerja, majikan yang terjejas juga akan turut dibantu oleh Kerajaan untuk meneruskan kelangsungan operasi perniagaan. Pelaksanaan **Program Subsidi Upah 4.0** dengan peruntukan sebanyak RM3.8 bilion memanfaatkan lebih 2.5 juta pekerja. Majikan akan diberi bantuan kewangan sebanyak RM600 bagi setiap pekerja dengan had sehingga 500 pekerja selama tempoh empat (4) bulan iaitu dua (2) bulan bagi semua sektor dalam fasa ke-2 PPN dan dua (2) bulan seterusnya khusus bagi sektor-sektor yang dikategorikan dalam senarai negatif termasuk industri pelancongan dan perhotelan semasa tempoh fasa ke-3. Di bawah PSU 4.0 juga, tiada lagi syarat had gaji dibawah RM4 ribu ditetapkan. Ini membolehkan majikan untuk memohon PSU 4.0 bagi pekerja yang bergaji lebih RM4 ribu.

Selain itu, majikan yang tidak dapat beroperasi semasa Perintah Kawalan Pergerakan (PKP) diberi pengecualian levi HRDCorp bagi tempoh dua (2) bulan. Manakala, bagi majikan daripada sektor-sektor yang baharu dirangkumi ekoran daripada peluasan Akta Pembangunan Sumber Manusia Berhad 2001 diberi pelanjutan pengecualian levi sehingga 31 Disember 2021.

Kerajaan juga melanjutkan program PenjanaKerjaya PERKESO dan dijenamakan sebagai PenjanaKerjaya 3.0 dengan beberapa penambahbaikan antaranya:

- a) mengurangkan had kelayakan gaji daripada RM1,500 kepada RM1,200 untuk program Malaysianisation sebagai dorongan kepada majikan untuk mengambil pekerja tempatan bagi menggantikan pekerja asing; dan

SOALAN NO : 9

- b) tempoh kontrak penggajian juga dilonggarkan daripada 12 bulan kepada enam (6) bulan bagi kategori pekerja berusia 50 tahun ke atas, golongan OKU dan bekas banduan.

Pelan Pemulihan Negara (PPN) yang dinamik dan komprehensif disokong oleh pembukaan beberapa sektor ekonomi secara berfasa berjaya merangsang aktiviti ekonomi sekaligus mendorong pengambilan lebih ramai pekerja dalam pasaran buruh. Pertumbuhan ekonomi negara dijangka akan terus berkembang apabila kesemua sektor ekonomi dibuka sepenuhnya sebaik negara mencapai imuniti kelompok penuh. Berdasarkan situasi ini, adalah dijangka kadar pengangguran di kalangan rakyat Malaysia pada tahun 2022 akan terus berada pada kadar yang stabil.

Kerajaan dari semasa ke semasa juga akan menambah baik langkah-langkah sedia ada dan akan mewujudkan lebih banyak program atau mekanisme bagi membantu rakyat mendapatkan pekerjaan dan mengatasi kadar pengangguran negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN JUNE LEOW HSIAD HUI
(HULU SELANGOR)**

TARIKH : 22 SEPTEMBER 2021 (RABU)

SOALAN

Minta **MENTERI BELIA DAN SUKAN** menyatakan situasi pekerjaan belia ketika penularan wabak COVID-19. Apakah inisiatif Kementerian bagi membantu belia yang terjejas akibat pandemik COVID-19 terutamanya isu pekerjaan.

JAWAPAN

Tuan Yang di-Pertua,

Kementerian Belia dan Sukan (KBS) melalui Agenda Pemerkasaan Belia Nasional (Strategi Untuk Belia Pasca COVID-19) bagi membantu belia resah menekankan kepada empat (4) Dimensi Ekonomi iaitu: Peluang Pekerjaan; Penciptaan Pekerjaan; Latihan dan Kemahiran; dan Dana dan Kemudahan.

Dalam usaha menangani masalah ini KBS menerusi Jabatan Belia dan Sukan Negara telah melaksanakan beberapa program bagi membantu belia yang terjejas akibat pandemik COVID-19 dalam menyediakan peluang kerjaya. Antara program-program yang dilaksanakan adalah seperti berikut:

Program Skim Perantisan Nasional. Skim Perantisan Nasional (SPN)

Merupakan program tawaran baru SPN berkonsepkan “*place and train*” bagi membantu melonjakkan kebolehpasaran belia dan menyediakan lebih banyak peluang untuk belia mendapatkan pengalaman bekerja. KBS bekerjasama dengan Kementerian Sumber Manusia di bawah inisiatif PENJANA bagi melaksanakan program SPN untuk belia mendapatkan pengalaman bekerja di sektor swasta dan syarikat berkaitan Kerajaan (GLC).

Program ini melibatkan penempatan latihan perantisan selama tiga (3) hingga enam (6) bulan. Perantis akan ditempatkan di syarikat mengikut keperluan bidang kerja dan kemahiran yang diperlukan oleh syarikat tersebut. Dalam tempoh penempatan ini, perantis akan mengikuti latihan kemahiran *soft skills* yang dikendalikan oleh penyedia latihan secara berkala. Latihan *soft skills* ini mensasarkan peningkatan modal insan dan profail perantis. Sehingga 23 Ogos 2021, jumlah peserta yang terlibat dalam program Skim Perantisan Nasional (SPN) ialah seramai 5,363 orang melibatkan sebanyak 169 syarikat/*training provider*.

Program *MyGig*

MyGig bertujuan untuk meningkatkan keterlibatan belia dalam ekonomi gig bagi menjana pendapatan. Program ini terbahagi kepada dua (2) iaitu:

MyGig Service - Menyediakan peluang pekerjaan dan jana pendapatan tambahan melalui platform digital dengan melaksanakan tugas secara hands-on seperti penghantaran, eHailing dan lain-lain perkhidmatan, dan

MyGig Digital Freelance - Menjana pendapatan tambahan dan mendapatkan pekerjaan melalui platform digital dan melaksanakan tugas secara atas talian dengan kemahiran tertentu seperti programming, pereka grafik dan lain-lain perkhidmatan yang berkemahiran.

Sehingga Jun 2021, seramai 2,676 orang belia telah mendaftar untuk menyertai program MyGig Service dan 1,009 daripadanya telah mendapat peluang pekerjaan. Manakala, 1,872 orang belia telah mendaftar untuk program *MyGig Digital Freelencer* dan 1,037 telah mendapat peluang pekerjaan.

Program Pembangunan Kemahiran Kerjaya menerusi kursus kursus webinar seperti Jom Cipta Kerja, Inspire! Kerjaya Agro, MYPRENEUR dan lain-lain yang bertujuan untuk menyampaikan maklumat-maklumat berkaitan peluang penciptaan pekerjaan dalam konteks: keusahawanan; pertanian; dan ekonomi digital secara langsung kepada belia. Sehingga 5 Ogos 2021, Sebanyak 34 siri kursus webinar telah dilaksanakan dengan penyertaan seramai 9,826 orang; dan

KBS turut diberi peranan dan tanggungjawab untuk menggerakkan Malaysia Vaccine Support Volunteer (MyVac) bagi mengisi keperluan tenaga kerja sukarelawan bukan kesihatan dengan membuka peluang pekerjaan melalui penempatan pekerjaan di Pusat Pemberian Vaksin (PPV) seluruh Malaysia. Kerajaan telah memperuntukkan sebanyak RM20juta bagi pembayaran elaun sukarelawan bukan kesihatan MyVac di atas khidmat bakti dan sumbangan tenaga serta masa mereka membabitkan seramai 8,056 orang sukarelawan sehingga Ogos 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH JAWAB : 22 SEPTEMBER 2021 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan sekiranya ada perancangan terbaharu untuk membina sebuah balai bomba di Pulau Buit. Beberapa kes kebakaran telah terjadi seperti kebakaran hutan dan kebakaran *total* sebuah masjid di Kampung Semop menunjukkan keperluan sebuah balai bomba dibina di Pulau Buit dengan kadar segera.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Perumahan dan Kerajaan Tempatan (KPKT) mengambil maklum akan permohonan balai bomba di kawasan Pulau Buit, Negeri Sarawak. Walau bagaimanapun, berdasarkan semakan terkini didapati keperluan pembinaan balai bomba di kawasan Pulau Buit adalah tidak mendesak berdasarkan kriteria pemarkahan Kajian Risiko Kebakaran (*Fire Cover*) seperti berikut:

- (i) Kepadatan penduduk;
- (ii) Bangunan komersil seperti pusat membeli belah, hotel dan lain-lain;
- (iii) Kilang dan industri;
- (iv) Risiko-risiko khas dari segi dimensi dan kepenggunaan;
- (v) Bangunan kerajaan dan aset kerajaan; serta
- (vi) Jenis-jenis risiko tinggi yang ada di sesuatu kawasan.

2. Selain itu, KPKT juga mendapati bahawa risiko kejadian kebakaran dan kecemasan di kawasan Pulau Bruit adalah rendah berdasarkan laporan statistik kecemasan JBPM yang bermula daripada tahun 2019 sehingga bulan Ogos tahun 2021. Jumlah kes yang dilaporkan bagi kebakaran dan khidmat kemanusiaan hanya sebelas (11) sahaja dalam tempoh hampir 3 tahun.

3. Untuk makluman Ahli Yang Berhormat juga, kawasan Pulau Bruit pada masa kini mendapat perlindungan kebakaran daripada Balai Bomba dan Penyelamat Daro, Negeri Sarawak yang mengambil masa lebih kurang 25 minit untuk sampai ke kawasan tersebut iaitu dalam jarak 16 kilometer. Dalam usaha untuk meningkatkan tempoh masa bertindak (*response time*), khidmat kebombaannya di kawasan tersebut juga dibantu oleh Pasukan Bomba Sukarela (PBS) Pulau Bruit dengan kekuatan tenaga anggota seramai 18 orang yang mendapat latihan dan dibekalkan dengan sut baju api, pam angkut serta hos oleh JBPM Negeri Sarawak.

4. KPKT berpandangan pemeraksanaan Pasukan Bomba Sukarela di Pulau Bruit pada masa sekarang merupakan langkah paling kos efektif untuk menangani risiko sedia ada di kawasan berkenaan. Walau bagaimanapun, Kementerian melalui JBPM akan membuat kajian keperluan pembinaan balai bomba dari semasa ke semasa berdasarkan faktor risiko serta keupayaan kewangan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB PUAN KASTHURIRAANI A/P PATTO (BATU KAWAN)

TARIKH : 22 SEPTEMBER 2021 (RABU)

SOALAN

PUAN KASTHURIRAANI A/P PATTO [BATU KAWAN] minta **MENTERI DALAM NEGERI** menyatakan apakah status siasatan ke atas kematian Pegawai Kastam Anisah Ali semasa bertugas tahun 2016 serta status siasatan keatas kes Raymond Koh, Amri Che Mat, Joshua Helmy, Ruth Sitepu serta Muhammad Riduan Abdullah yang menculik anak Indira Gandhi.

JAWAPAN

Tuan Yang Di Pertua,

Untuk makluman ahli Yang Berhormat, bagi kes yang melibatkan Allahyarhamah Anisah binti Ali, pihak PDRM masih menjalankan siasatan berkaitan kes berkenaan sepertimana laporan polis Pasir Mas/004927/2016 bertarikh 07 Oktober 2016 di bawah Seksyen 304(A) Kanun Keseksaan. Laporan polis berkenaan merujuk kepada insiden kereta yang dinaiki oleh pengadu iaitu seorang pegawai Kastam Kanan bersama pasukan Jabatan Kastam Diraja Malaysia telah dihindar dan dilanggar oleh kenderaan saspek dipercayai tonto sehingga terbabas dan melanggar pokok. Kejadian yang berlaku di Jalan Kampong Banggol Chicha, Pasir Mas itu telah mengakibatkan pegawai Kastam yang berkenaan meninggal dunia.

Hasil siasatan, pihak polis telah membuat tangkapan terhadap enam (6) suspek dan salah seorang suspek telah dituduh di bawah seksyen 201 Kanun Keseksaan. Walau bagaimanapun, suspek telah dilepaskan dan dibebaskan tanpa dipanggil membela diri pada 11/02/2019. Manakala suspek-suspek lain telah dibebaskan dengan jamin kerana tiada bukti kukuh untuk mengaitkan penglibatan mereka dalam kes ini. Pihak polis masih menjalankan siasatan dan usaha bagi mengesan mangsa dan memburu suspek-suspek lain dalam kes ini sedang giat dijalankan. Sehubungan itu, saya tidak berhasrat untuk mengulas lebih lanjut berhubung kes ini untuk tidak mengganggu siasatan.

Yang Berhormat,

PDRM masih meneruskan siasatan berhubung kehilangan Pastor Raymond Koh berkait Kelana Jaya report 1540/2017 bertarikh 13 Februari 2017 di bawah Seksyen 365 Kanun Keseksaan (menculik dan melarikan seseorang dengan niat hendak mengurungnya dengan sulit). Setakat ini seorang lelaki yang telah didakwa di mahkamah pada 15 Januari 2018 akan dibicarakan pada 9 Disember 2021. Siasatan juga masih diteruskan bagi mengesan mangsa. Bagi kes kehilangan Joshua Helmy dan isterinya Ruth Sitepu berkait Sg. Way repot 2249/2017 dan kes kehilangan Amri Che Mat

SOALAN : 12

berkait Kangar repot 008554/2016, kes berkenaan telah diklasifikasi sebagai orang hilang.

Pihak polis masih belum dapat sebarang petunjuk baru untuk mengesan mangsa-mangsa yang terlibat dan pihak keluarga mangsa juga tidak menerima sebarang panggilan untuk menuntut wang tebusan atau komunikasi lain. Pihak polis masih berusaha untuk mengesan mangsa dan suspek yang bertanggungjawab.

Yang Berhormat,

Buat masa ini, berdasarkan siasatan pihak polis, dipercayai Muhammad Ridzuan Abdullah tidak berada di Malaysia serta tidak berada tetap di satu-satu tempat di luar negara tetapi bergerak dari satu tempat ke satu tempat yang lain dalam usaha menghalang daripada dikesan serta menyukarkan pihak berkuasa menjalankan siasatan.

Pihak polis juga menjalin kerjasama dengan pihak berkuasa negara luar bagi mengenalpasti lokasi subjek.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN JUGAH ANAK MUYANG @ TAMBAT
(LUBUK ANTU)**

TARIKH : 22 SEPTEMBER 2021 (RABU)

SOALAN

Minta **MENTERI BELIA DAN SUKAN** menyatakan apakah inisiatif yang boleh diambil oleh Kementerian berkenaan sukan E-sport yang dilihat mampu menjana pendapatan dalam kalangan belia luar bandar.

JAWAPAN

Tuan Yang di-Pertua,

Kementerian Belia dan Sukan (KBS) telah melancarkan Esports Integrated (ESI), inisiatif untuk memangkin sebuah ekosistem esukan yang rancak, mapan, dan inklusif di Malaysia pada Oktober 2020.

ESI merupakan usaha dalam mengembangkan Program Skim Perantisan Nasional yang telah dilancarkan oleh Kementerian ke sektor esukan. Menerusi usaha yang sedang digerakkan ESI ini, perantis belia termasuklah belia luar bandar akan melalui latihan *soft-skills* dan *on-the-job training* bersama syarikat yang berkaitan dengan esukan, dan seterusnya berpeluang untuk diserap terus bekerja dengan majikan berkenaan.

Di samping itu, ESI juga sedang merangka program pembangunan kapasiti belia bagi membolehkan mereka menjana pendapatan sendiri bukan sahaja sebagai pemain profesional dan menerusi penyertaan dalam kejohanan esukan kompetitif, bahkan juga menerusi penganjuran acara dan penstriman langsung. Latihan secara maya diberikan oleh pelatih-pelatih profesional untuk membantu para belia, tidak kira di bandar atau luar bandar, untuk menceburi bidang esukan.

Selain itu, ESI juga telah menganjurkan Liga Esukan Malaysia 2021 atau MEL21 pada 9 Julai hingga 31 Ogos 2021, yang menawarkan hadiah keseluruhan berjumlah RM200,000. Tujuan utama MEL21 adalah untuk mencungkil bakat-bakat akar umbi yang baru dan memberikan platform kepada pemain pelapis untuk bertanding di skala yang lebih besar dan kompetitif. Liga ini dilaksanakan di kesemua 13 negeri dan tiga (3) Wilayah Persekutuan dengan penyertaan hampir 30,000 orang para pemain dari kawasan bandar dan luar bandar, sebagai peluang dan pendedahan kepada mereka sebelum menjadi seorang pemain profesional suatu hari nanti.

Memandangkan esukan merupakan trend minat semasa golongan belia yang mempunyai impak besar dalam membantu penjaan pendapatan golongan belia, Kementerian melalui Jabatan Belia dan Sukan Negara (JBSN) telah melaksanakan beberapa inisiatif seperti kursus/ bengkel dan pertandingan kepada golongan belia terutamanya di peringkat akar umbi.

Sebagai contoh, pelaksanaan Bengkel E-sports *Skill* sejak tahun 2019 merupakan program ikonik tahunan JBSN. Bengkel yang berteraskan pendidikan dan pendedahan ini menawarkan 12 modul kerjaya industri sukan elektronik antaranya berkaitan penstriman, pengurusan pasukan esukan dan *healthy esports*. Sehingga kini seramai 2,197 orang peserta dari komuniti esukan negara yang turut meliputi penyertaan belia luar bandar telah mengikuti bengkel ini.

Manakala bagi inisiatif pertandingan pula, insentif hadiah kemenangan juga mampu menjana pendapatan golongan belia. Sepanjang tahun 2019 hingga 2020 sebanyak RM 195,000 hadiah wang kemenangan telah disediakan oleh pihak Kerajaan kepada para belia yang memenangi pertandingan di peringkat akar umbi sehinggalah di peringkat kebangsaan antaranya seperti MyStay@HomeChallenge, MyBorneo E-Force dan KBS MyLadies PUBG. Secara keseluruhannya, seramai 76,707 orang belia telah turut serta dalam pelbagai kejohanan esukan.

Untuk makluman Tuan Yang di-Pertua juga, dengan adanya ekosistem sukan elektronik yang lebih kukuh dan transformasi digital yang menyeluruh, pendekatan tentang esukan kepada kalangan belia luar bandar dapat diperkukuhkan. Persatuan-persatuan Sukan Elektronik Negeri dengan bantuan Kementerian Belia dan Sukan melalui Majlis Sukan Negara (MSN) dalam proses menaiktaraf Esports Studio di setiap negeri. Dengan adanya Esports Studio di negeri, ianya akan dijadikan tempat untuk penganjuran kejohanan esports dan juga sebagai *production studio* untuk penganjuran kejohanan dalam talian. Dengan secara tidak langsung memberikan peluang pekerjaan bagi belia yang berminat untuk berkecimpung di dalam bidang esukan.

Dengan adanya pembangunan studio esukan ianya dapat menyatupadukan pelbagai pihak yang berkepentingan dalam industri teknologi bagi mewujudkan persekitaran digital yang lebih kompetitif di dalam dan luar bandar. Penglibatan kalangan belia juga membantu pembangunan esukan dengan lebih pesat di seluruh Negeri.

Sekian, terima kasih.

**MESYUARAT PERTAMA, PENGGAL KEEMPAT,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

DARIPADA : TUAN MORDI BIMOL [MAS GADING]

TARIKH : 22 SEPTEMBER 2021 (RABU)

SOALAN

minta **MENTERI PEMBANGUNAN LUAR BANDAR** menyatakan rancangan Kerajaan dari segi peruntukan bagi kos bina baru sistem paip bekalan air graviti dan kos penyelenggaraan di kawasan luar bandar bagi bekalan air graviti yang sedia ada yang amat diperlukan dan nyatakan dengan jelas agensi Kerajaan yang bertanggungjawab bagi pelaksanaan projek sebegini.

JAWAPAN

Tuan Yang di-Pertua,

Untuk makluman Yang Berhormat, projek bekalan air alternatif termasuk di dalam skop pelaksanaan Program Bekalan Air Luar Bandar (BALB) bagi menyediakan bekalan air ke kampung yang tidak ekonomik untuk penyambungan paip retikulasi. Untuk melaksanakan projek BALB alternatif ini, sumber air alternatif seperti air bukit atau air bawah tanah di cadangan lokasi projek perlu dipastikan terlebih dahulu.

Bagi tujuan ini, waran peruntukan akan dikemukakan kepada Pejabat KPLB Negeri (PKN) sebagai Agensi Pelaksana. Pelaksanaan projek boleh dibuat dengan melibatkan Jabatan/ Agensi di peringkat negeri seperti Pejabat Daerah, Jabatan Kemajuan Orang Asli (JAKOA), Unit Bekalan Air dan Kebersihan Alam Sekeliling (BAKAS), Jabatan Mineral dan Geosains (JMG), Jabatan Bekalan Air Luar Bandar (JBALB) Negeri Sarawak dan seumpamanya. Perolehan projek ini dibuat dengan kaedah sebut harga bagi kos projek yang tidak melebihi RM800,000 untuk tahun 2021.

Projek yang telah siap akan diserahkan kepada komuniti kampung yang terlibat untuk digunakan dan diselenggara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN RUBIAH BINTI HAJI WANG
(KOTA SAMARAHAN)**

TARIKH : 22 SEPTEMBER 2021 (RABU)

SOALAN

Minta **MENTERI BELIA DAN SUKAN** menyatakan usaha semasa Kementerian untuk meningkatkan kesedaran dalam kalangan bakal pengundi muda atau baharu terutamanya mereka yang menjelang umur 18 tahun.

JAWAPAN

Tuan Yang di-Pertua,

Untuk makluman Yang Berhormat, Kementerian Belia dan Sukan sentiasa peka dan prihatin untuk memberi kesedaran yang berterusan kepada orang muda mengenai hak mereka untuk mengundi. Antara inisiatif Kementerian ialah dengan pelaksanaan Program Rukun Negara@Belia (RNB) khusus untuk golongan belia di negara ini.

Objektif utama program RNB adalah untuk;

- a. mewujudkan kesedaran belia tentang peranan, keterlibatan dan ambil tahu tentang kelayakan mengundi dari usia 18 tahun;
- b. melahirkan golongan belia yang memahami perlembagaan dan struktur pentadbiran Kerajaan serta terlibat secara langsung dalam

soal demokrasi sesebuah negara;

- c. membantu belia dalam meningkatkan jati diri untuk menjadi warganegara yang bertanggungjawab; dan
- d. meningkatkan nilai patriotik dan semangat cintakan negara dalam kalangan belia.

Program RNB juga digarap selaras dengan bidang-bidang keutamaan belia yang digariskan di dalam Dasar Belia Malaysia (DBM) yang menyasarkan lapan (8) kumpulan sasaran belia iaitu belia bersekolah, belia pengajian tinggi, belia bekerjaya, perkumpulan belia, belia massa, belia Malaysia antarabangsa, belia minoriti dan golongan terpinggir dan belia berisiko.

Ini adalah untuk memastikan ilmu kenegaraan dapat dipelajari dan difahami dengan lebih meluas oleh segenap lapisan belia di negara ini melalui kaedah interaktif, ringkas dan padat. Pengisian program meliputi penghayatan Prinsip Rukun Negara dan sistem pemerintahan negara berpandukan kepada Perlembagaan Persekutuan agar menghasilkan masyarakat yang bersatu padu dan cakna (*awareness*) kepada susur galur pentadbiran negara.

Pengisian utama program ini adalah untuk memberi kesedaran kepada golongan belia supaya menunaikan tanggungjawab sebagai pengundi berikutan penurunan had umur mengundi dari 21 tahun kepada 18 tahun selain meningkatkan pengetahuan literasi politik. Kementerian melalui iLEAD telah merancang sebanyak 114 program RNB untuk dilaksanakan pada tahun 2021. Sehingga **15 September 2021** sebanyak **84** program berjaya dijalankan dengan penyertaan sejumlah **55,696** orang.

Kaedah pelaksanaan RNB adalah secara bersemuka dan juga secara dalam talian berikutan pelaksanaan Perintah Kawalan Pergerakan (PKP) yang dikuatkuasakan oleh pihak Kerajaan. Pelaksanaan program secara dalam talian ini adalah sebagai usaha alternatif Kementerian berikutan halangan untuk mengadakannya secara bersemuka. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN
DARIPADA : YB TUAN CHAN MING KAI [ALOR STAR]
TARIKH : 22 SEPTEMBER 2021 (RABU)

SOALAN

TUAN CHAN MING KAI [ALOR SETAR] minta **MENTERI SUMBER MANUSIA** menyatakan berkenaan pekerja asing di sektor restoran:-

- (a) apakah syarat dan jumlah terkini; dan
- (b) kelayakan dan proses penukaran pekerja asing daripada sektor lain.

JAWAPAN

Tuan Yang Di Pertua,

Permohonan pengambilan pekerja asing bagi subsektor restoran boleh dibuat oleh mana-mana individu atau syarikat atau koperasi yang mempunyai premis sendiri atau premis sewaan dengan perjanjian sewaan yang melebihi tiga tahun. Pihak majikan adalah **diwajibkan untuk mematuhi semua undang-undang perburuhan yang berkuatkuasa**. Di samping itu, **kuota** kelayakan pekerja asing adalah satu nisbah tiga iaitu **satu pekerja tempatan bagi setiap tiga pekerja asing**.

Pada dasarnya, majikan dibenarkan untuk membuat permohonan pertukaran majikan bagi pekerja asing yang asalnya bukan dari sektor yang sama. Terdapat beberapa syarat yang perlu dipatuhi iaitu:

SOALAN NO : 16

- i. Permohonan dibuat oleh majikan asal;
- ii. Permohonan hendaklah dikemukakan ke Ibu Pejabat, Jabatan Tenaga Kerja Semenanjung Malaysia (JTKSM) yang akan mengeluarkan surat sokongan;
- iii. Semua undang-undang perburuhan serta lain-lain syarat yang ditetapkan oleh Agensi Kawal Selia (AKS) dipatuhi;
- iv. Majikan masih mempunyai kuota kelayakan untuk menggajikan pekerja asing baharu;
- v. Lulus temuduga di Pusat Kelulusan Setempat (*One Stop Centre*) di bawah Kementerian Dalam Negeri yang mana proses temuduga akan dibuat oleh AKS iaitu Kementerian Perdagangan Dalam Negeri dan Hal Ehwal Pengguna; dan
- vi. Mana-mana pekerja asing yang digajikan di bawah program pemutihan, pembantu rumah, pekerja bukan dari pemegang Pas Lawatan Kerja Sementara (PLKS) dan pemegang PLKS tahun penggajian ke 10 tidak dibenarkan untuk bertukar majikan.

Menurut statistik Jabatan Imigresen Malaysia (Mylmms), bilangan pekerja asing aktif sehingga 31 Ogos 2021 bagi sektor perkhidmatan ialah seramai 159,720 orang dan tiada data khusus bagi subsektor restoran. Namun, berdasarkan maklumat daripada Pertubuhan Keselamatan Sosial (PERKESO), seramai **53,853 pekerja asing** mencarum di bawah **industri perkhidmatan penginapan dan makanan serta minuman**.

**MESYUARAT PERTAMA, PENGGAL KEEMPAT
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATUK WILSON UGAK ANAK KUMBONG
[HULU RAJANG]**

TARIKH : 22 SEPTEMBER 2021 (RABU)

SOALAN

minta **MENTERI PEMBANGUNAN LUAR BANDAR** menyatakan sekiranya pihak Kementerian bercadang untuk membina Jalan Nanga Gaat ke Rumah Gare, Nanga Kain, Baleh, Kapit, Jalan Nanga Mujong ke Bandar Baru Tunoh, Baleh, Kapit dan Jalan ke Ulu Jelalong, Tubau, Bintulu.

JAWAPAN

Tuan Yang di-Pertua,

Untuk makluman Yang Berhormat, Projek Membina Jalan Nanga Gaat ke Rumah Gare, Nanga Kain, Baleh, Kapit telah diluluskan di bawah tajuk "Membina Jalan Ng Gaat/ Ng Sebiro/ Rh Tungku Sg. Gaat, Bahagian Kapit, Sarawak" dengan kos keseluruhan berjumlah RM180.0 juta. Projek ini telah diluluskan di bawah *Rolling Plan* Pertama, Rancangan Malaysia Kedua belas (RP-1, RMKe-12) Tahun 2021. Skop projek yang diluluskan adalah membina jalan sepanjang membina jalan sepanjang 30km standard JKR R1 termasuk tiga (3) buah Jambatan. Status semasa projek ini adalah sedang di dalam peringkat pelantikan perunding Kejuruteraan Awam dan Struktur, Perunding Alam Sekitar dan Jurukur tanah. Projek ini dijangka tender pada bulan Ogos tahun 2022.

Manakala, Projek Membina Jalan Dari Rumah Timothy, Nanga Mujong Ke SK Nanga Tiau, Sg Mujong, Kapit, Sarawak telah dipohon di bawah *Rolling Plan* Kedua, Rancangan Malaysia Kedua Belas (RP2, RMKe-12) Tahun 2022. Skop projek yang dimohon adalah Membina Jalan Sepanjang 22km Dengan Standard JKR R1 dan 4 Buah Jambatan. Pelaksanaannya adalah tertakluk kepada kelulusan Unit Perancang Ekonomi, Jabatan Perdana Menteri dan kedudukan kewangan semasa Kerajaan.

Untuk makluman Yang Berhormat juga, Projek Jalan ke Ulu Jelalong, Tubau, Bintulu tiada di dalam Senarai Keutamaan Negeri yang telah dikemukakan kepada pihak Kementerian. Sehubungan itu, sekiranya terdapat keperluan mendesak bagi melaksanakan jalan tersebut, kerjasama Yang Berhormat adalah dipohon bagi mengemukakan permohonan tersebut kepada Unit Perancang Negeri (EPU) Sarawak untuk dimasukkan ke dalam Senarai Keutamaan Negeri sebelum diangkat kepada Unit Perancang Ekonomi, Jabatan Perdana Menteri (EPU, JPM) bagi kelulusan di bawah *Rolling Plan* berikutnya.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB KARUPAIYA A/L MUTUSAMI (PADANG
SERAI)**

TARIKH : 22 SEPTEMBER 2021 (RABU)

SOALAN

TUAN KARUPAIYA A/L MUTUSAMI [PADANG SERAI] minta **MENTERI DALAM NEGERI** menyatakan akan isu berkaitan sijil kelahiran dan kewarganegaraan. Pada masa ini didapati permohonan tidak dapat diselesaikan memandangkan ramai kakitangan berkaitan masih dalam fasa "*Work from home*". Mohon berikan penjelasan.

JAWAPAN

Tuan Yang Di-Pertua,

Selaras dengan pengumuman pelaksanaan Pelan Pemulihan Negara (PPN) di seluruh negara dan bagi mengimbangi penyampaian perkhidmatan yang optimum kepada rakyat dan pencegahan penularan wabak COVID-19 di tempat bertugas, Kerajaan telah menetapkan bahawa pengoperasian pejabat-pejabat Kerajaan dilaksanakan secara hibrid melalui keberadaan di pejabat dan Bekerja Dari Rumah (BDR). Walau bagaimanapun, perkhidmatan-perkhidmatan teras Kementerian melalui JPN terus diberikan kepada rakyat melalui inisiatif berikut:

- i) Bagi perkhidmatan kaunter yang tidak boleh dilaksanakan secara atas talian, **JPN telah membangunkan satu sistem yang dinamakan Sistem MyJanjiTemu** untuk memudahkan orang ramai mendapatkan slot tempahan janji temu sebelum datang berurusan di kaunter JPN. JPN juga telah meningkatkan kapasiti pengoperasian kaunter sehingga 50% bagi tujuan kelancaran urusan di kaunter JPN.
- ii) JPN juga memberi kelonggaran bagi mana-mana pendaftaran kelahiran biasa dan pendaftaran kelahiran yang memasuki fasa daftar lewat dalam tempoh PKP **dengan memanjangkan tempoh pendaftaran sehingga 90 hari selepas tamat tempoh PKP**.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATUK ROBERT LAWSON CHUAT [BETONG]

TARIKH : 22 SEPTEMBER 2021 (RABU)

SOALAN

**DATUK ROBERT LAWSON CHUAT [BETONG] minta MENTERI
PERDAGANGAN DALAM NEGERI DAN HAL EHWAL PENGGUNA
menyatakan :-**

- (a) kaedah pemantauan yang dibuat terhadap peniaga atas talian di medium media sosial yang gagal mempamerkan harga barangan serta perkhidmatan dan statistik terkini peniaga atas talian yang telah diambil tindakan akibat kesalahan tersebut mengikut pecahan medium media sosial; dan
- (b) adakah Kementerian melaksanakan pemantauan dan penguatkuasaan terhadap peniaga atas talian yang menjual barangan cetak rompak melalui platform jualan atas talian dan juga di media sosial.

JAWAPAN

Yang di-Pertua,

Bagi memastikan pematuhan ke atas pengendali pasar dalam talian ke atas peruntukan perundangan yang dikuatkuasakan oleh KPDNHEP, langkah berikut telah diambil;-

- (a) Kementerian menjalankan pemantauan ke atas pengendali pasar dalam talian supaya mematuhi peruntukan di bawah Akta Perlindungan Pengguna 1999, Peraturan-peraturan Perlindungan Pengguna (Urus Niaga Perdagangan Elektronik) 2012. Pengendali pasar dalam talian diwajibkan untuk memaparkan di laman web mereka maklumat-maklumat seperti berikut:
- i. Nama individu/perniagaan/syarikat;
 - ii. Nombor pendaftaran perniagaan/syarikat;
 - iii. Alamat Emel dan no.telefon atau alamat peniaga melalui tapak web atau pasar dalam talian;
 - iv. Perihalan tentang ciri utama barang dan perkhidmatan itu;
 - v. Harga penuh barang atau perkhidmatan, termasuklah kos pengangkutan, cukai dan apa-apa kos lain;
 - vi. Kaedah pembayaran;
 - vii. Terma-terma dan syarat syarat; dan
 - viii. Anggaran masa penghantaran barang atau perkhidmatan kepada pembeli.
- (b) Menjalankan pemeriksaan di premis pengendali pasar dalam talian seperti mempamerkan harga barangan atau perkhidmatan, penyimpanan dan penyenggaraan rekod nama, nombor telefon dan alamat peniaga *online* yang berniaga di platform mereka untuk tempoh dua (2) tahun;
- (c) Menjalinkan kerjasama dengan Suruhanjaya Komunikasi dan Multimedia Malaysia (SKMM) bagi menghalang akses laman web (*Site Blocking*) atau penurunan kandungan (contents removal) di bawah seksyen 263(2) Akta Komunikasi & Multimedia 1998 (AKM 1998);

- (d) Berkerjasama dengan Pembekal Internet (ISP) dan Syarikat Telekomunikasi (Telcos) bagi mendapatkan maklumat pemilik laman sesawang atau pemilik talian komunikasi yang terlibat dengan penipuan pasar dalam talian; dan
- (e) Berkerjasama dengan pengendali tapak pasar dalam talian untuk memberikan pemakluman atau notis amaran di dalam tapak pasar mereka untuk memperingatkan pengguna supaya berhati-hati semasa menjalankan pembelian pasar dalam talian.

Sekiranya mana-mana peniaga atas talian gagal mematuhi mana-mana peraturan semasa, pengguna boleh menyalurkan aduan di saluran yang telah disediakan.

Untuk makluman ahli yang terhormat jumlah kes atas talian yang diambil tindakan pada tahun 2020 ialah 6 kes (peniaga atas talian melalui media sosial 4 kes, pengendali pasar atas talian 1 kes, dan lain-lain peniaga atas talian 1 kes) dan pada tahun 2021 ialah 6 kes (media sosial 1 kes, pengendali pasar atas talian 1 kes, dan lain-lain peniaga atas talian 1 kes).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN NOOR AMIN AHMAD (KANGAR)

TARIKH : 22 SEPTEMBER 2021 (RABU)

SOALAN

TUAN NOOR AMIN BIN AHMAD [KANGAR] minta **MENTERI DALAM NEGERI** menyatakan jumlah pendatang asing tanpa izin yang telah ditahan sejak Mac 2020 sehingga kini. Apakah jenis tindakan yang dikenakan kepada mereka.

JAWAPAN

Tuan Yang Di Pertua,

Mohon izin supaya soalan daripada YB Kangar ini dijawab bersekali dengan soalan daripada YB Seputeh memandangkan kedua-dua soalan yang diutarakan menyentuh isu yang sama iaitu mengenai penangkapan dan pengusiran Pendatang Asing Tanpa Izin (PATI) sejak pandemik COVID-19.

Kementerian Dalam Negeri melalui Jabatan Imigresen Malaysia komited dalam memastikan keselamatan negara diutamakan dengan melaksanakan operasi penguatkuasaan secara berterusan serta tindakan pencegahan bagi mengelakkan berlakunya peningkatan jumlah pendatang asing tanpa izin (PATI) di negara ini.

Bermula 18 Mac 2020 hingga 24 Ogos 2021, Jabatan Imigresen Malaysia telah melaksanakan 5,110 operasi penguatkuasaan melibatkan tangkapan 14,847 orang PATI daripada pelbagai negara dan 246 majikan atas pelbagai kesalahan imigresen di bawah Akta Imigresen 1959/63 dan Peraturan-Peraturan Imigresen 1963. Manakala, Bagi tempoh yang sama, jumlah penghantaran pulang tahanan yang berada di Depot Imigresen sehingga 26 Ogos 2021 adalah seramai 15,634 orang.

Proses penghantaran pulang tahanan ke negara asal yang dikendalikan oleh Jabatan Imigresen Malaysia merangkumi proses pengesahan warganegara dan penyediaan dokumen perjalanan serta dengan pihak Perwakilan Asing.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 22 SEPTEMBER 2021 (RABU)

SOALAN

DATO' SRI BUNG MOKTAR BIN RADIN minta **MENTERI KESIHATAN** menyatakan apakah perancangan Kerajaan dalam menyuntik semangat para petugas “frontliners” yang kian tertekan agar terus memberikan perkhidmatan yang cemerlang memandangkan mereka ini sentiasa terdedah dan berisiko dengan jangkitan virus COVID-19 semasa bertugas.

JAWAPAN

Tuan Yang di-Pertua,

Kerajaan amat prihatin tentang bebanan para petugas barisan hadapan yang berdepan dengan tugas menangani wabak COVID-19 serta risiko jangkitan semasa bertugas. Beberapa inisiatif telah dilaksanakan khusus untuk petugas barisan hadapan bagi meningkatkan semangat mereka agar dapat melaksanakan tugas dengan efektif dan berkesan.

1. Lawatan oleh pengurusan atasan ke lapangan untuk meninjau keadaan petugas barisan hadapan dari aspek kesihatan mental dan kebajikan.
2. Program Perkhidmatan Kesihatan Mental dan Sokongan Psikososial atau *Mental Health Psychosocial Support (MHPSS)* di peringkat negeri membuat lawatan *PFA (Psychological First Aid)* di lapangan bagi mengenalpasti petugas yang memerlukan *PFA* dan intervensi lanjut akibat terkesan dari segi emosi.
3. Memastikan pelaksanaan penggiliran tugas yang bersesuaian untuk mengelakkan *burnout*.
4. Mengedarkan *Mental Health Tool Kit* kepada petugas yang turut mengandungi tips-tips penjagaan mental sendiri.
5. Pelaksanaan elaun petugas barisan hadapan yang terlibat dalam menangani pandemik COVID-19.
6. Menyediakan perkhidmatan penjagaan untuk anak-anak petugas barisan hadapan yang perlu bertugas menangani COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH JAWAB : 22 SEPTEMBER 2021 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan langkah-langkah yang telah diambil untuk menyediakan peralatan dan kemudahan kepada Jabatan Bomba dan Penyelamat Malaysia yang menjadi *frontliners* untuk menangani pandemik COVID-19.

JAWAPAN

Tuan Yang di-Pertua,

1. Untuk makluman ahli Yang Berhormat, Kementerian Perumahan dan Kerajaan Tempatan (KPKT) memandang serius kesiapsiagaan, keselamatan, kesihatan awam dan kebajikan *frontliners* sewaktu di lapangan agar berada pada tahap yang terbaik di setiap masa. Jabatan Bomba dan Penyelamat Malaysia (JBPM) telah diberikan kepercayaan dan tanggungjawab oleh KPKT untuk menyelaras pelaksanaan disinfeksi dan tugas-tugas lain sepanjang pandemik COVID-19. Sehingga **7 September 2021**, JBPM telah mengendalikan sebanyak **66,816 operasi** berkaitan COVID-19 seperti senarai dibawah:

Bil.	Jenis Operasi	Jumlah
1.1	<i>Humanitarian Assistance and Disaster Relief (HADR)</i>	8
1.2	Pemindahan mangsa melibatkan <i>Person Under Investigation</i> (PUI) dan <i>Person Under Surveillance</i> (PUS)	6,352
1.3	Pengurusan jenazah COVID-19	1,152
1.4	Disinfeksi bangunan termasuk Pusat Kuarantin Berisiko Rendah (PKRC) di MAEPS, Serdang dan Melaka	44,337
1.5	Bertugas di Pusat Pemberian Vaksin (PPV)	202
Bil.	Jenis Operasi	Jumlah
1.6	Pemeriksaan keselamatan kebakaran stesen kuarantin	225
1.7	Lai-lain tugas merangkumi:	

	<p>a) menghantar dan mengagihkan makanan ke kawasan PKPD;</p> <p>b) menghantar bekalan vaksin menggunakan pengangkutan udara;</p> <p>c) menghantar sampling (<i>swab test</i>);</p> <p>d) penghantaran mayat dari hospital ke pusat sementara dan membantu pengebumian;</p> <p>e) bantuan logistik bagi sebarang pengoperasian seperti Program Mobilisasi Vaksin Komuniti (MOVAK); dan</p> <p>f) <i>Greater Klang Valley Taskforce</i> (GKVT).</p>	14,540
--	--	--------

2. KPKT telah mengambil beberapa langkah proaktif dalam menyediakan peralatan dan kemudahan kepada JBPM seperti berikut:

(i) menyelaraskan peralatan dan kemudahan yang sedia ada JBPM merangkumi di darat, air dan udara;

(ii) membuat perolehan peralatan dan kelengkapan yang diperlukan bagi memastikan perjalanan tugas sepanjang COVID-19 ini dapat dilaksanakan dengan berkesan; dan

(iii) memperkemaskan koordinasi dan kerjasama dari segi bantuan peralatan serta kemudahan inter-agensi termasuk daripada pihak Agensi Pengurusan Bencana Negara (NADMA) dan Kementerian Kesihatan Malaysia (KKM).

3. Selain itu, KPKT juga telah menyediakan peruntukan sebanyak RM7,403,622.20 yang merangkumi Kumpulan Wang COVID-19 (KWC) berjumlah RM7,046,702.20 dan sebanyak RM356,920 daripada pihak NADMA bagi tujuan berikut:

(i) membuat perolehan peralatan perlindungan diri (PPE);

- (ii) bahan kimia untuk program sanitasi/ disinfeksi;
- (iii) perolehan bahan api untuk kenderaan melibatkan tugas-tugas COVID-19; dan
- (iv) penyelenggaraan jentera /kenderaan dan peralatan bermotor untuk kerja-kerja COVID-19.

4. Sebagai menghargai sumbangan dan pengorbanan *frontliner* JBPM, KPKT telah memastikan JBPM tersenarai sebagai salah satu agensi kecemasan dan keselamatan yang layak mendapat tuntutan bayaran elaun bulanan khas barisan hadapan. Sejumlah RM4,385,600.00 telah dibelanjakan bagi pembayaran elaun tahun 2020 dan RM6,755,200.00 sehingga bulan Julai tahun 2021.

5. Saya juga ucapkan terima kasih kepada Ahli Yang Berhormat kerana turut prihatin berkaitan kelengkapan peralatan dan kemudahan kepada JBPM didalam menjalankan fungsi sebagai *frontliners*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATO' HAJI MOHD. SALIM SHARIF [JEMPOL]

TARIKH : 22 SEPTEMBER 2021 (RABU)

SOALAN

DATO' HAJI MOHD. SALIM SHARIF [JEMPOL] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan perancangan bagi mengawal harga pasaran kit ujian sendiri COVID-19 yang terlalu mahal sehingga membebankan para pengguna.

JAWAPAN

Yang di-Pertua,

Kementerian telah menetapkan harga maksimum kit ujian pantas antigen covid-19 (ujian sendiri) bagi borong RM16.00 seunit dan runcit RM19.90 seunit. Penetapan harga maksimum telah diwartakan dan berkuatkuasa pada 5 September 2021 melalui P.U (A) 348 Perintah Kawalan Harga Dan Antipencatutan (Penentuan Harga Maksimum) (No.7) 2021.

Dalam membuat penetapan harga kit ujian sendiri Covid-19 (ujian sendiri), Kementerian telah mengadakan sesi libat urus dengan pemegang-pemegang taruh dalam industri kit ujian sendiri Covid-19 (ujian sendiri) termasuk fasiliti farmasi dan klinik. Penelitian dari segi kos pengeluaran dan kos pengimportan telah dibuat dan di analisa. Maka penetapan harga maksimum ini adalah pada kadar wajar yang tidak merugikan peniaga dan mampu beli rakyat. Buat masa ini, Kerajaan tidak berhasrat untuk memberikan sebarang subsidi bagi pembelian kit ujian sendiri ini.

Sepanjang tempoh pemeriksaan serta pemantauan ke atas penjualan kit ujian pantas antigen COVID-19 (ujian sendiri) bermula 5 sehingga 16 September 2021, sebanyak 1,734 premis telah diperiksa membabitkan 91 premis borong dan 1,643 premis runcit dan daripada pemeriksaan tersebut sebanyak 10 amaran dikeluarkan kerana menjual melebihi harga maksimum yang ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 15 SEPTEMBER 2021 (RABU)

SOALAN

DATUK ROZMAN BIN ISLI [LABUAN] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan pecahan jenis perniagaan yang tidak dapat bertahan dan telah menutup perniagaan mereka dalam tempoh pandemik dan usaha Kementerian bagi membantu mereka untuk bangkit semula.

JAWAPAN

Yang di-Pertua,

1. Berdasarkan rekod Suruhanjaya Syarikat Malaysia (SSM), jumlah penamatan perniagaan (milikan tunggal dan perkongsian) di bawah Akta Pendaftaran Perniagaan 1956 (APP 1956) yang mencatatkan penutupan tinggi dalam tempoh 1 Januari 2020 hingga 31 Ogos 2021 ialah yang melibatkan sektor perdagangan jualan borong, jualan runcit, pembaikan kenderaan bermotor dan motosikal. Statistik tahun 2019 juga menunjukkan trend yang sama iaitu sebanyak **13,527 perniagaan** dalam sektor ini telah menamatkan perniagaan.
2. Pada tahun 2020, jumlah penamatan perniagaan yang melibatkan sektor perdagangan jualan borong, jualan runcit, pembaikan kenderaan bermotor dan motosikal ialah sebanyak **10,487 perniagaan** manakala sebanyak **5,050 perniagaan** dalam sektor ini telah menamatkan perniagaan dalam tempoh 1 Januari 2021 hingga 31 Ogos 2021.

3. Seterusnya di bawah Akta Syarikat 2016, jumlah petisyen penggulangan yang melibatkan syarikat dalam sektor perdagangan jualan borong, jualan runcit, pembaikan kenderaan bermotor dan motosikal pada tahun 2020 ialah sebanyak **984 petisyen**. Dalam tempoh 1 Januari 2021 hingga 31 Ogos 2021, jumlah petisyen penggulangan yang melibatkan syarikat dalam sektor yang sama ialah sebanyak **562 petisyen**. Jumlah petisyen yang direkodkan pada tahun 2019 melibatkan syarikat yang menjalankan perniagaan dalam sektor ini adalah lebih tinggi iaitu sebanyak **1,596 petisyen**.

4. Bagi Akta Perkongsian Liabiliti Terhad 2012, pada tahun 2019 terdapat sebanyak **162 petisyen** penggulangan yang melibatkan perkongsian liabiliti terhad dalam sektor perdagangan jualan borong, jualan runcit, pembaikan kenderaan bermotor dan motosikal direkodkan dan **163 petisyen** penggulangan direkodkan untuk sektor yang sama pada tahun berikutnya. Bagi tempoh 1 Januari 2021 hingga 31 Ogos 2021, jumlah petisyen penggulangan yang didaftarkan adalah sebanyak **296** petisyen yang merangkumi **27.0% (80 petisyen)** oleh perkongsian liabiliti terhad dalam sektor perdagangan jualan borong, jualan runcit, pembaikan kenderaan bermotor dan motosikal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN RAMLI BIN DATO' MOHD NOR
[CAMERON HIGHLANDS]**

TARIKH : 22 SEPTEMBER 2021 (RABU)

SOALAN

Minta **MENTERI PEMBANGUNAN LUAR BANDAR** menyatakan apakah langkah yang dilakukan oleh pihak Kementerian bagi memastikan masyarakat Orang Asli tidak terlepas daripada menerima semua bantuan serta inisiatif yang dilaksanakan oleh Kerajaan ketika pandemik COVID-19.

JAWAPAN

Tuan Yang di-Pertua,

Pihak Kementerian melalui Jabatan Kemajuan Orang Asli (JAKOA) telah melaksanakan beberapa langkah bagi memastikan masyarakat Orang Asli tidak terlepas daripada menerima semua bantuan serta inisiatif yang dilaksanakan oleh Kerajaan ketika pandemik COVID-19. Antaranya, ialah pihak JAKOA telah menyediakan bantuan bakul makanan kepada semua Orang Asli mengikut maklumat data Ketua isi Rumah (KIR) yang sedia ada. Selain itu, kepimpinan Orang Asli seperti Batin serta Jawatankuasa Pembangunan dan Keselamatan Kampung Orang Asli (JPKKOA) turut memberi kerjasama dalam aspek pengurusan dan pengangkutan dalam menguruskan jenazah Orang Asli yang meninggal akibat COVID-19.

Pihak JAKOA juga mendapatkan kerjasama dengan Maraliner, Kementerian Kesihatan Malaysia (KKM) dan COVID-19 Immunisation Task Force (CITF) untuk membawa pesakit Covid-19 ke Pusat Kuarantin dan Rawatan COVID-19 Berisiko Rendah (PKRC) dan Pusat Kesiapsiagaan dan Tindak Cepat Krisis (CPRC) yang berdekatan bagi membendung penularan wabak Covid-19 ini dari semakin menular.

Seterusnya, melalui program mobil vaksinasi yang mempercepatkan lagi pengambilan vaksin khususnya di tempat yang jauh dari Pusat Pemberian Vaksin (PPV) tetapi boleh capai dengan bas.

Selain itu, program bantuan kerajaan merangkumi bantuan di bawah Pelan Jana Semula Ekonomi Negara (PENJANA), Pelan Pemulihan Negara (PEMULIH), MySalam dan Peka40 turut disebarkan menggunakan pelbagai platform yang ada.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK SERI SHAMSUL ISKANDAR @ YUSRE
BIN MOHD AKIN (HANG TUAH JAYA)**

TARIKH : 22 SEPTEMBER 2021 (RABU)

SOALAN

Minta **MENTERI BELIA DAN SUKAN** menyatakan apakah wujud perancangan untuk membangunkan **program khas** pembangunan sukan di negeri Melaka susulan kejayaan jurulatih sukan angkat berat melatih Hidilyn Diaz merangkul emas pertama buat negara Filipina serta kemenangan anak Melaka iaitu Aaron Chia merangkul pingat gangsa di Sukan Olimpik 2020.

JAWAPAN

Tuan Yang di-Pertua,

Pembangunan atlet-atlet muda sering diberikan tumpuan khusus oleh Kementerian Belia dan Sukan melalui Majlis Sukan Negara (MSN) dalam pelaksanaan **pembangunan sukan berprestasi tinggi negara**. Pembangunan terarah kepada 16 sukan teras sebagai persediaan kontinjen negara menghadapi temasya sukan utama seperti Sukan SEA, Sukan Asia, Sukan Komanwel dan Sukan Olimpik.

Bagi tujuan tersebut, MSN telah menjalinkan **kerjasama yang erat** bersama Majlis Sukan Negeri untuk melaksanakan program latihan secara bersistematik kepada atlet-atlet peringkat negeri di seluruh negara yang berumur di bawah 21 tahun menerusi **Program Pelapis Negeri**. Manakala, **Program Bakat** pula dilaksanakan di peringkat daerah di mana merupakan proses pendedahan latihan awal ke atas bakat-bakat muda berumur di antara 13 hingga 15 tahun.

Program Pelapis Negeri dan Bakat adalah **program pembangunan jangka panjang** yang berterusan agar negara sentiasa mempunyai bakat-bakat baharu yang mampu menggantikan atlet senior di masa hadapan. Atlet-atlet yang terpilih menjalani latihan di bawah Program Pelapis Negeri dan Bakat ini merupakan **bakat-bakat baharu** yang berkualiti untuk digilap ke peringkat tertinggi.

Bagi tahun **2021**, seramai **6,738** orang atlet, **413** orang jurulatih daripada **313** buah Pusat Latihan Negeri (PLN) menjalani latihan secara separa masa di bawah **Program Pelapis Negeri** manakala **2,293** orang atlet, **175** orang jurulatih di **162** buah Pusat Latihan Daerah (PLD) turut menjalani latihan di bawah **Program Bakat** di seluruh Malaysia.

Untuk makluman Yang Berhormat, **Melaka** mempunyai seramai **437** orang atlet, **31** orang jurulatih daripada **18** buah Pusat Latihan Negeri (PLN) yang sedang menjalani latihan di bawah **Program Pelapis Negeri menerusi 15 jenis sukan**. Manakala seramai **159** orang atlet, **13** orang jurulatih di **12** buah Pusat Latihan Daerah (PLD) pula menjalani latihan di bawah **Program Bakat (lapan (8) jenis sukan)**. Kedua-dua program ini dikawal selia oleh Majlis Sukan Negeri Melaka bersama Persatuan Sukan Negeri Melaka dengan pemantauan MSN.

Selain itu, Kementerian juga melaksanakan **Program Projek Khas** iaitu Program Pembangunan Bolasepak Negara (NFDP), Program Pembangunan Hoki Negara (NHDP) dan Program Pembangunan Ragbi Negara (NRDP) di seluruh negara termasuk Negeri Melaka.

SOALAN NO : 26

Hasil pelaksanaan Program Pelapis sejak dari tahun 2006, beberapa atlet **anak watan Negeri Melaka telah mengharumkan nama negara** di temasya sukan utama diantaranya ialah Aaron Chia, Goh Soon Huat, Ong Yew Sim, Goh Liu Ying, Lee Meng Yean (Badminton), Khairul Hafiz Jantan, Badrul Hisyam Abdul Manap (Olahraga), Tracie Ang, Tan Ing Yueh (Gimnastik Artistik), Jonathan Wong Guanjie (Menembak), Mohd Juwaidi Mazuki, Iman Aishah Norazam (Memanah), Chai Fong Ying, Chai Fong Wei, Wong Weng Soon, Sydney Chin Sy Xuan (Wushu), Magdelene Low Phey Chyi, Tai Chia Qian (Bola Keranjang).

Pihak Kementerian akan meneruskan kesinambungan pelaksanaan program-program pembangunan sedia ada di peringkat negeri dan daerah dengan beberapa penambahbaikan yang akan dilakukan bagi mengimbangi program latihan yang telah terjejas sepanjang tahun 2020 dan 2021 ini akibat pandemik Covid-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 22 SEPTEMBER 2021 (RABU)

SOALAN

DATO' HAJI AHMAD NAZLAN BIN IDRIS minta **MENTERI KESIHATAN** menyatakan usaha lanjut Kerajaan untuk menggubal dasar mewajibkan suntikan vaksin imunisasi COVID-19 ke atas seluruh rakyat Malaysia dan apakah cadangan tindakan undang-undang mengikut peruntukan sedia ada yang boleh dikenakan ke atas mereka yang menolak untuk divaksinasi.

JAWAPAN:

Tuan Yang di-Pertua,

1. Pemberian vaksin COVID-19 kini secara amnya dilaksanakan secara sukarela. Setiap penerima vaksin perlu menandatangani borang persetujuan sebelum menerima suntikan vaksin COVID-19 setelah membaca dan memahami isi kandungan borang persetujuan tersebut.

2. Cadangan untuk menggubal dasar mewajibkan suntikan vaksin COVID-19 ke atas seluruh rakyat Malaysia sedang diteliti, termasuk cadangan menggunakan Akta Pencegahan dan Pengawalan Penyakit Berjangkit 1988 (Akta 342) bagi tujuan tersebut. Faktor-faktor yang perlu diambil kira sebelum dasar mewajibkan suntikan vaksin COVID-19 dibuat adalah:

- (i) Faktor keselamatan dan keberkesanan vaksin COVID-19: Vaksin COVID-19 kini didaftarkan secara pendaftaran bersyarat untuk penggunaan kecemasan bagi mengawal pandemik COVID-19.
- (ii) Memerlukan penguatkuasaan yang ketat dan menyeluruh bagi mengenalpasti individu yang tidak layak diberikan vaksin COVID-19 serta menentukan kesahihan sijil vaksinasi termasuk yang menerima vaksin di luar negara dan individu yang tiada sijil digital atau hilang kad vaksinasi. Pelaksanaan aktiviti penguatkuasaan dan pemantauan ini memerlukan kerjasama Kementerian dan Agensi lain.
- (iii) Liputan imunisasi dos 1 suntikan vaksin COVID-19 kini adalah hampir 50% dan kadar penerimaan vaksin di Malaysia adalah tinggi. Berdasarkan hasil kajian pada bulan April 2021 oleh Kementerian Kesihatan, kadar penerimaan vaksin oleh penduduk Malaysia ialah 85% manakala yang tidak setuju menerima vaksin hanyalah 5%. Oleh itu, sasaran Program Imunisasi COVID-19 Kebangsaan dijangka boleh dicapai tanpa perlu mewajibkan imunisasi COVID-19.

3. Selain cadangan menggunakan Akta Pencegahan dan Pengawalan Penyakit Berjangkit 1988 (Akta 342) bagi mewajibkan pengambilan suntikan vaksin COVID-19, Kementerian Kesihatan turut meneliti usaha lain untuk menggalakkan penduduk di Malaysia mengambil vaksin COVID-19, iaitu:

- (i) Pilihan 'Opt Out' untuk tidak mengambil vaksin bagi individu yang tidak mahu mengambil vaksin dan bersetuju untuk tidak menikmati kemudahan-kemudahan yang diberikan kepada penerima vaksin COVID-19 lengkap;
- (ii) Mewajibkan individu telah lengkap pengambilan vaksin COVID-19 sebagai syarat untuk melakukan aktiviti tertentu seperti memasuki fasiliti awam (premis makan, kompleks beli belah, premis-premis kerajaan, universiti, perpustakaan dan sebagainya) dan aktiviti sosial (bersukan dan sebagainya);
- (iii) Mewajibkan pengambilan vaksin dalam sektor tertentu seperti sektor kesihatan, sektor keselamatan, sektor pendidikan, sektor perkhidmatan dan sebagainya. Akta Keselamatan dan Kesihatan Pekerjaan 1994 [Akta 514] boleh digunakan. Hal ini kerana, Akta 514 adalah berkenaan tanggungjawab majikan untuk memastikan keselamatan, kesihatan dan kebajikan orang-orang yang sedang bekerja terhadap risiko kepada keselamatan atau kesihatan yang berjangkit daripada aktiviti orang-orang yang sedang bekerja. Perkara ini adalah termasuk juga dengan pemberian vaksin COVID-19. Sehubungan itu, Akta 514 juga boleh digunakan bersama-sama dengan Akta 342.

4. Buat masa ini, SOP sedia ada yang dikeluarkan oleh Majlis Keselamatan Negara mengenai pemberian kelonggaran kepada penerima vaksin yang lengkap terus digunakan sebagai satu keistimewaan bagi penerima vaksin dos lengkap.

5. Kementerian Kesihatan akan meneruskan usaha advokasi dan memberi penerangan mengenai kepentingan pengambilan vaksin

SOALAN NO : 27

COVID-19 kepada masyarakat, di samping menambahbaik pelaksanaan Program Imunisasi COVID-19 Kebangsaan bagi menggalakkan penerimaan oleh masyarakat di setiap pelusuk negara ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN LIM KIT SIANG (ISKANDAR PUTERI)

TARIKH : 22 SEPTEMBER 2021 (RABU)

SOALAN

TUAN LIM KIT SIANG [ISKANDAR PUTERI] minta **MENTERI DALAM NEGERI** menyatakan mengapa pihak polis telah mengheret seorang warga emas dari Negeri Sembilan ke Kedah untuk siasatan ke atas kritikan beliau terhadap Menteri Besar Kedah, terutamanya semasa wabak COVID-19 sedang menular dengan meluas.

AWAPAN

Tuan Yang Di Pertua,

Satu (1) laporan polis berkait Merbok rpt 1140/2021 telah dibuat ke atas pemilik akaun *facebook* yang didapati mengeluarkan kata-kata kesat terhadap YAB Menteri Besar Kedah Tuan Haji Muhammad Sanusi bin Md Nor. Kes telah disiasat di bawah seksyen 506 Kanun Keseksaan (Ugutan Jenayah), Seksyen 14 Akta Kesalahan-Kesalahan Kecil 1955 dan Seksyen 233 Akta Komunikasi dan Multimedia 1998. Hasil siasatan, pemilik akaun tersebut menetap di Negeri Sembilan. Bagi melengkapkan siasatan, pemilik akaun tersebut perlu dibawa ke Kedah untuk siasatan lanjut.

Polis Diraja Malaysia (PDRM) sentiasa akan memastikan Standard Operating Procedure (SOP) dipatuhi semasa melaksanakan sebarang siasatan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : DATO' SRI RICHARD RIOT ANAK JAEM
[SERIAN]**

TARIKH : 22 SEPTEMBER 2021 (RABU)

SOALAN

Dato' Sri Richard Riot anak Jaem [Serian] minta **MENTERI SUMBER MANUSIA** menyatakan apakah status terkini Pembinaan Institut Latihan Perindustrian (ILP) Serian, Sarawak.

JAWAPAN

Tuan Yang Di Pertua,

Untuk makluman Ahli Yang Berhormat,

Institut Latihan Perindustrian (ILP) Serian, Sarawak merupakan Institusi Latihan Jabatan Tenaga Manusia (ILJTM) ke-33 dan terletak di Bukar Sadong dengan keluasan 56.76 ekar. Projek ini telah diluluskan dalam Rancangan Malaysia Ke-11 (RMK-11) dan pembinaan telah bermula pada April 2018.

Projek ini dijangka siap pada Ogos 2022. Sehingga kini, status kemajuan fizikal semasa adalah sebanyak 41.2%. Kemajuan projek dijangka akan terus meningkat bersesuaian dengan status negeri Sarawak yang sekarang berada dalam Fasa 3 Pelan Pemulihan Negara (PPN) yang membolehkan pelbagai aktiviti dibenarkan beroperasi termasuklah sektor pembinaan.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 22 SEPTEMBER 2021 (RABU)

SOALAN

TUAN CHA KEE CHIN minta **MENTERI KESIHATAN** menyatakan apakah Kementerian ada perancangan untuk melakukan saringan mega atau ujian secara besar-besaran dalam komuniti untuk mengenal pasti mereka yang positif COVID-19 agar langkah-langkah kuarantin dan sebagainya boleh disusuli dengan segera. Berikan huraian terhadap keputusan Kerajaan.

JAWAPAN

Tuan Yang di-Pertua,

1) Untuk makluman Ahli Yang Berhormat, penularan COVID-19 adalah suatu proses yang dinamik berbanding dengan aktiviti pengujian yang bersifat statik. Pendekatan Kementerian Kesihatan adalah menerusi 'mass testing secara bersasar' yang akan dapat memastikan pengurusan sumber yang berkesan dan bertepatan, dengan mengambilkira keupayaan untuk memaksimumkan keberhasilan daripada aktiviti saringan yang dilaksanakan.

2) Sekiranya pendekatan, ujian saringan mega atau ujian secara besar-besaran dilakukan secara berterusan, maka ia akan memberikan impak kepada kapasiti perkhidmatan kesihatan termasuklah dalam fokus kementerian untuk memberikan rawatan lanjut bagi kes-kes serius COVID-19.

3) Selain daripada itu, masyarakat juga telah diperkenalkan dengan penggunaan kit ujian sendiri atau RTK Antigen. Ujian tersebut dapat membantu serta memudahkan masyarakat dalam proses pengesanan awal dan pengawalan jangkitan COVID-19. Secara tidak langsung, ia juga dapat membantu mengurangkan bebanan petugas kesihatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH : 22 SEPTEMBER 2021 (RABU)

SOALAN

TUAN YUSUF BIN ABD. WAHAB minta **MENTERI KESIHATAN** menyatakan tentang status terkini pembinaan Klinik Kesihatan di Kampung Semop. Ini kerana dalam Sidang Dewan Rakyat yang lepas, Menteri memaklumkan bahawa klinik ini sudah ditender dan akan dimulakan pembinaan secepat mungkin.

JAWAPAN:

Tuan Yang di-Pertua,

1. Untuk makluman Ahli Yang Berhormat, Projek Klinik Kesihatan (Jenis 6) Dengan Kuarters Semop, Mukah telah diluluskan oleh Unit Perancang Ekonomi, Jabatan Perdana Menteri (UPE, JPM) di bawah Rancangan Malaysia Kesepuluh (RMKe-10) tahun 2013. Agensi Pelaksana bagi projek ini ialah Jabatan Kerja Raya Sarawak (JKR Sarawak).
2. Untuk makluman Ahli Dewan juga, Projek ini telah ditender kali pertama pada 11 Januari 2017. Walau bagaimanapun, Kementerian Kewangan Malaysia (MOF) pada 29 Jun 2018 telah mengarahkan projek yang belum dikeluarkan Surat Setuju Terima untuk ditender semula.
3. JKR Sarawak telah mengiklankan tender projek ini buat kali kedua pada 19 Oktober 2019. Walau bagaimanapun, pelantikan kontraktor tidak dapat diteruskan berikutan harga petender-petender melebihi kos projek yang diluluskan.
4. Projek ini ditender semula oleh JKR Sarawak buat kali ketiga pada 12 September 2020 tetapi pelantikan kontraktor ditangguhkan berikutan harga petender melebihi kos projek yang diluluskan.
5. Untuk makluman Ahli Dewan seterusnya, ekoran harga petender yang melebihi kos projek, UPE, JPM pada 4 Jun 2021 telah meluluskan permohonan kenaikan kos projek. JKR Sarawak dijangka akan mengeluarkan Surat Setuju Terima (SST) kepada petender berjaya pada September 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 22 SEPTEMBER 2021 (RABU)

SOALAN

TUAN CHAN MING KAI minta **MENTERI KESIHATAN** menyatakan berapa kompaun PKP yang telah dikeluarkan serta antaranya berapa yang sudah dibayar, belum dibayar dan dibicara di mahkamah.

JAWAPAN

Tuan Yang di-Pertua,

Jumlah kompaun yang telah dikeluarkan sejak 1 April 2020 sehingga 31 Ogos 2021 adalah sebanyak 181,704 kompaun atas pelbagai kesalahan. Daripada jumlah kompaun tersebut, bayaran kompaun yang telah dikutip adalah sebanyak RM 72.72 juta. Jumlah kompaun yang masih belum dijelaskan adalah sebanyak 110,882 kompaun, manakala sebanyak 360 kes telah dibicarakan di mahkamah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]**

TARIKH : 22 SEPTEMBER 2021 (RABU)

SOALAN

DATUK HAJAH AZIZAH BINTI DATUK SERI PANGLIMA HAJI MOHD DUN minta **MENTERI KESIHATAN** menyatakan bagaimana kementerian dapat memastikan pengesanan kontak rapat kes positif COVID-19 melalui aplikasi MySejahtera adalah jitu memandangkan terdapat kes-kes kontak rapat yang tidak dihubungi dan dikemaskini dalam sistem My-Sejahtera?

JAWAPAN

Tuan Yang di-Pertua,

1. Kes kontak rapat dikesan oleh MySejahtera dengan 3 cara seperti berikut:
 - (i) Laporan saringan kontak rapat melalui laporan SIMKA positive COVID-19;
 - (ii) Laporan sendiri melalui aplikasi Mysejahtera di bawah "COVID19 Status"; dan
 - (iii) Laporan melalui "hyperlink" yang dilaporkan oleh pengguna MySejahtera yang disahkan positive COVID-19.

SOALAN NO : 33

2. Selain daripada itu, terdapat satu ciri terbaharu MySejahtera yang membolehkan setiap pengguna untuk mendaftar keluar selepas mengunjungi ke sesebuah premis atau lokasi. Ciri terbaharu ini juga akan dapat membantu pengesanan kontak dengan lebih tepat.
3. Kesemua maklumat kontak akan dihantar ke pangkalan data (*database*) MySejahtera dan individu yang didapati atau dikesan sebagai kontak rapat akan ditukarkan status di MySejahtera kepada "KONTAK RAPAT/CLOSE CONTACT".
4. Kejituan dapat dipastikan dimana ketika individu yang didapati positif, mereka akan memasukkan maklumat kontak rapat mereka ke dalam aplikasi MySejahtera. Individu yang dinamakan kontak rapat oleh kes positif ini akan mendapat notifikasi untuk penukaran status kepada "KONTAK RAPAT/CLOSE CONTACT" dan perlu menjawab soalan untuk deklaras status risiko di mana mereka boleh memasukkan maklumat kes positif yang mereka dapati kontak. Jika maklumat yang dimasukkan tidak sama seperti yang diberikan individu kes positif, status mereka tidak akan ditukarkan kepada "KONTAK RAPAT/CLOSE CONTACT" sebaliknya akan kekal "RISIKO RENDAH/LOW RISK".

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN R. SIVARASA [SUNGAI BULOH]

TARIKH : 22 SEPTEMBER 2021 (RABU)

SOALAN

TUAN R. SIVARASA minta **MENTERI KESIHATAN** menyatakan kenapa selepas kes-kes baru COVID-19 telah mula naik ke jumlah ribuan selepas pilihan raya negeri Sabah, Kerajaan tidak membuat persediaan awal untuk menambahkan semua sumber di hospital awam dan sediakan semua hospital swasta supaya kalau kes-kes meningkat secara mendadak sehingga 20,000 macam sekarang, sektor kesihatan kita telah sedia dengan kelengkapan katil ICU, katil biasa, peralatan oksigen dan sumber manusia dan tidak akan menghadapi tekanan keterlaluan dan teruk macam sekarang.

JAWAPAN:

Tuan Yang di-Pertua,

1. Bagi menangani peningkatan kes-kes COVID-19, Kementerian Kesihatan Malaysia telah melaksanakan beberapa langkah bagi memastikan kapasiti rawatan berada pada tahap optimum. Antara langkah-langkah tersebut adalah:

- i. **Pengubahsuaian ruangan tertentu** (*repurpose area*) di dalam dan di luar bangunan hospital untuk dijadikan wad dan ICU sementara telah dilaksanakan termasuk pembinaan Hospital Medan, ICU Medan, Modular ICU dan penggunaan ICU di hospital swasta.

- ii. **Pembinaan modular ICU** telah disediakan di Hospital Tengku Ampuan Rahimah, Hospital Kepala Batas dan Hospital Melaka. Lima (5) lagi Modular ICU sedang dibina di Hospital Sultanah Aminah Johor Bahru, Hospital Tuanku Jaa'far Seremban, Hospital Selayang, Hospital Sibu dan Hospital Tawau di mana pembekalan dan pembinaan sedang dijalankan.
- iii. Penambahan katil, **khemah atau struktur tambahan** di Jabatan Kecemasan dan Trauma bagi menampung kemasukan mendadak pesakit.
- iv. Meningkatkan kapasiti hospital memberi rawatan oksigen kepada pesakit dengan memasang beberapa **tangki oksigen tambahan** di hospital-hospital dan PKRC. Silinder oksigen serta *oxygen concentrator* juga dibekalkan bagi menampung keperluan semasa.
- v. Selain daripada penyediaan fasiliti, peralatan-peralatan perubatan dan bukan perubatan turut dipertingkatkan bagi memperkukuhkan keupayaan dan sebagai kesiapsiagaan dalam menangani pandemik COVID-19.
- vi. Kerjasama dengan pelbagai pihak iaitu Hospital Universiti, Angkatan Tentera Malaysia dan hospital swasta di dalam perawatan pesakit COVID-19 dan pesakit bukan COVID-19 juga juga diadakan.
- vii. Kerjasama bersama pihak NGO seperti MERCY Malaysia dalam menyediakan beberapa hospital medan di Labuan, Hospital Melaka, HTAR dan Hospital Selayang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 22 SEPTEMBER 2021 (RABU)

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan sejauh mana kerjasama yang dilaksanakan dengan Kementerian Kesihatan Malaysia (KKM) dalam isu harga runcit kit ujian sendiri COVID-19 agar tidak membebankan rakyat terutama golongan B40.

JAWAPAN

Yang di-Pertua,

Kementerian telah menetapkan harga maksimum kit ujian pantas antigen covid-19 (ujian sendiri) bagi borong RM16.00 seunit dan runcit RM19.90 seunit. Penetapan harga maksimum telah diwartakan dan berkuatkuasa pada 5 September 2021 melalui P.U (A) 348 Perintah Kawalan Harga Dan Antipencatutan (Penentuan Harga Maksimum) (No.7) 2021.

Dalam membuat penetapan harga kit ujian sendiri Covid-19 (ujian sendiri), Kementerian telah mengadakan sesi libat urus dengan pemegang-pemegang taruh dalam industri kit ujian sendiri Covid-19 (ujian sendiri) termasuk fasiliti farmasi dan klinik. Penelitian dari segi kos pengeluaran dan kos pengimportan telah dibuat dan di analisa. Maka penetapan harga maksimum ini adalah pada kadar wajar yang tidak merugikan peniaga dan mampu beli rakyat.

Sepanjang tempoh pemeriksaan serta pemantauan ke atas penjualan kit ujian pantas antigen COVID-19 (ujian sendiri) bermula 5 sehingga 16 September 2021, sebanyak 1,734 premis telah diperiksa membabitkan 91 premis borong dan 1,643 premis runcit dan daripada pemeriksaan tersebut sebanyak 10 amaran dikeluarkan kerana menjual melebihi harga maksimum yang ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : TUAN M. KULASEGARAN
[IPOH BARAT]**

TARIKH : 22 SEPTEMBER 2021 (RABU)

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan :-

- (a) data dan pencapaian yang telah dicapai dalam skim PENJANA untuk Pembangunan Sumber Manusia di mana Kerajaan telah memperuntukkan RM250 juta untuk skim ini; dan
- (b) adakah geran ini telah digunakan sepenuhnya dan menyatakan jumlah pekerja yang telah dimanfaatkan dan memperolehi pekerjaan melalui skim ini.

JAWAPAN

Tuan Yang Di Pertua,

Kementerian Sumber Manusia (KSM) menerusi Pembangunan Sumber Manusia Berhad (PSMB) telah melancarkan inisiatif PENJANA HRDCorp dengan objektif untuk menyokong agenda Kerajaan di dalam memulihkan ekonomi negara yang terkesan disebabkan oleh pandemik COVID-19. Lima (5) skim telah diperkenalkan melalui inisiatif ini yang terdiri daripada *Place & Train*, *B40 Development*, *SME Development*, *Industrial Revolution 4.0* dan Gerak Insan Gemilang. Skim-skim ini diwujudkan dengan tujuan untuk membantu rakyat dalam mendapat penempatan pekerjaan, *self-employed* serta menambah dan meningkatkan kemahiran mereka.

Peruntukan berjumlah RM250 juta yang diterima telah digunakan sepenuhnya. Setakat 31 Ogos 2021, PSMB telah meluluskan sebanyak 85,527 pelatih. Daripada jumlah tersebut, 67,255 pelatih telah mengikuti skim yang melibatkan penempatan pekerjaan dan pekerjaan sendiri.

PSMB menerima permohonan latihan melebihi jumlah peruntukan yang disalurkan oleh Kerajaan. Oleh itu, PSMB telah memadankan jumlah tersebut menggunakan levi PSMB sebanyak RM250 juta bagi memastikan lebih ramai yang terkesan mendapat manfaat melalui inisiatif ini.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN WILLIAM LEONG JEE KEEN
(SELAYANG)**

TARIKH : 22 SEPTEMBER 2021 (RABU)

SOALAN

TUAN WILLIAM LEONG JEE KEEN [SELAYANG] minta **MENTERI DALAM NEGERI** menyatakan mengapa polis menghalang ahli-ahli Parlimen memasuki bangunan Parlimen pada 2 Ogos, 2021 dan siapa yang mengarahkan pihak polis berbuat demikian.

JAWAPAN

Tuan Yang Di Pertua,

Merujuk kepada pemberitahuan oleh Setiausaha Dewan Rakyat melalui surat bertarikh 31 Julai 2021, mantan YAB Perdana Menteri telah memaklumkan bahawa persidangan Mesyuarat Khas Penggal Ketiga Parlimen ke-14 pada Isnin, 2 Ogos 2021 ditangguhkan ke suatu tarikh yang akan ditetapkan kelak.

Penangguhan ini dibuat adalah selaras dengan penilaian risiko oleh Kementerian Kesihatan yang mengesahkan bahawa Parlimen Malaysia merupakan lokaliti berisiko untuk berlakunya penularan jangkitan COVID-19.

Oleh demikian, adalah menjadi tanggungjawab pasukan Polis Diraja Malaysia (PDRM) selaku pasukan yang menguatkuasakan Akta Pencegahan dan Pengawalan Penyakit Berjangkit 1988 [Akta 342] untuk memastikan sesuatu kawasan yang telah disahkan sebagai kawasan

SOALAN NO : 37

berisiko tidak dimasuki oleh mana-mana individu.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DATO' NGEH KOO HAM [BERUAS]

TARIKH : 22 SEPTEMBER 2021 (RABU)

SOALAN

DATO' NGEH KOO HAM minta **MENTERI KESIHATAN** menyatakan jumlah kaunselor bertauliah, pakar psikologi dan psikiatri dalam Malaysia dan apakah langkah-langkah yang diambil untuk meningkatkan jumlah mereka bagi memenuhi keperluan yang kian meningkat di kalangan rakyat Malaysia untuk perkhidmatan mereka.

JAWAPAN:

Tuan Yang di-Pertua,

1. Untuk makluman Ahli Yang Berhormat, bilangan kaunselor bertaualiah di sektor perkhidmatan awam dan swasta yang berdaftar dengan Lembaga Kaunselor Malaysia (LKM) adalah seramai 9,580. Seramai 346 orang pegawai kaunselor berkhidmat di fasiliti Kementerian Kesihatan Malaysia (KKM) yang terdiri daripada 146 adalah pegawai tetap dan 200 pegawai kontrak.

2. Bagi pegawai psikologi klinikal di Malaysia, terdapat seramai 50 orang di mana 42 orang berkhidmat di hospital KKM dan lapan (8) orang lagi di fasiliti kesihatan swasta.

3. Manakala, bagi Pakar Psikiatri pula, terdapat seramai 459 orang Pakar Psikiatri di seluruh negara iaitu seramai 256 orang di fasiliti KKM dan seramai 203 orang di fasiliti Kementerian Pertahanan, Kementerian Pengajian Tinggi dan sektor swasta.

4. Sebagai langkah awal bagi memenuhi keperluan rakyat Malaysia untuk perkhidmatan yang melibatkan kesihatan mental, KKM telah membeli perkhidmatan daripada 200 kaunselor secara kontrak (CFS). Kaunselor kontrak ini telah ditempatkan di 138 Pejabat Kesihatan Daerah bagi memberikan perkhidmatan secara berjadual di 831 klinik kesihatan di seluruh negara. Sejak Oktober 2020 sehingga 31 Mei 2021, seramai 111,150 orang pesakit di klinik kesihatan seluruh Malaysia telah mendapat perkhidmatan psikologi kaunseling daripada pegawai CFS ini secara bersemuka dan secara atas talian.

5. KKM sentiasa berusaha untuk meningkatkan lagi bilangan pakar termasuklah Pakar Psikiatri. Antara langkah-langkah yang telah dilaksanakan adalah:

- (i) Meningkatkan slot tajaan Hadiah Latihan Persekutuan untuk Program Latihan Kepakaran Sarjana Perubatan bagi bidang Psikiatri daripada 46 slot pada tahun 2015 kepada 60 slot pada tahun 2020;

- (ii) Melantik semula secara kontrak Pakar Perubatan warganegara yang telah bersara wajib untuk berkhidmat dengan KKM mengikut keperluan; dan
- (iii) Peningkatan peluang latihan kepakaran perubatan melalui Latihan Kepakaran Parallel Pathway *Member of the Royal College of Psychiatrists* (MRCPsych) (dengan izin) di KKM untuk melahirkan lebih ramai Pakar Psikiatri.

6. Bagi memberi perkhidmatan kesihatan terbaik di seluruh negara, Kerajaan telah melaksanakan pelbagai inisiatif untuk meningkatkan penyampaian perkhidmatan kaunseling dan psikiatri termasuk melaksanakan usaha kolaboratif dengan agensi lain dan swasta dengan memanfaatkan kaunselor di seluruh negara.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS

PERTANYAAN : JAWAB LISAN

DARIPADA : DATUK SERI DR. HAJI DZULKEFLY BIN
AHMAD [KUALA SELANGOR]

TARIKH : 21 SEPTEMBER 2021 (SELASA)

SOALAN

Minta **MENTERI KESIHATAN** menyatakan kenapa di kalangan negeri seperti Kelantan dan Kedah, terdapat banyak kluster yang telah dilaporkan lebih dari sebulan dari tarikh pengesanan kes indeks? Adakah ini satu kegagalan *contact tracing* dan apakah akibat kelewatan pentakrifan ini.

JAWAPAN

Tuan Yang di-Pertua,

1. Pengesanan kes dan kontak (*contact tracing*) adalah salah satu aktiviti penting dalam tindakan kawalan dan pencegahan penyakit berjangkit, bagi menghalang penularan jangkitan berterusan dalam komuniti. Aktiviti ini sebaik-baiknya dijalankan sejurus selepas notifikasi kes positif diterima dan terus membuat penentuan kluster dengan mengaitkan data epidemiologi kes-kes ini. Dengan kapasiti sedia ada, beberapa buah negeri dengan jumlah kes harian yang tinggi, tidak berupaya menjalankan pengklusteran kes dalam masa ditetapkan. Walau bagaimanapun, tindakan pengasingan kes dan kontak telah dilakukan sementara menentukan kaitan epidemiologi antara kes-kes bagi pengisytiharan kluster di negeri-negeri ini

2. Bagi memudahcara siasatan kes dan kontak dalam menentusahkan kluster, KKM telah menggunakan aplikasi MySejahtera bagi notifikasi kes dan pengesanan kontak. Selain itu, mobilisasi petugas dari pelbagai agensi kerajaan dan swasta juga dilakukan bagi menjalankan aktiviti secara fizikal terutama di kawasan dengan liputan internet yang rendah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIM CHEE KEONG
[BUKIT MERTA JAM]**

TARIKH : 22 SEPTEMBER 2021 (RABU)

SOALAN

Minta **MENTERI KESIHATAN** menyatakan jumlah derma dari segi nilai barangan dan tunai yang diberikan oleh pihak swasta dan masyarakat umum kepada hospital, klinik kesihatan, pusat kuarantin dan PPV mengikut pecahan agensi dan negeri sejak tahun 2020.

JAWAPAN:

Tuan Yang di-Pertua,

1. KKM telah menerima sumbangan dalam bentuk **wang tunai** dan **barangan**. Bagi sumbangan wang tunai, KKM telah menubuhkan Akaun Amanah Khas pada 23 Mac 2020 bagi membolehkan pihak swasta, NGO dan individu yang prihatin untuk menyalurkan sumbangan bagi kegunaan Barisan Hadapan semasa berlakunya wabak COVID-19. Sejak Akaun Amanah Khas ditubuhkan, KKM telah menerima sumbangan wang tunai sebanyak RM36,268,535.92 hingga 25 Ogos 2021. Daripada jumlah berkenaan, RM33,610,275.73 telah diluluskan untuk perbelanjaan oleh Jawatankuasa di peringkat KKM dimana RM27,082,996.51 telah dibelanjakan dan RM6,527,279.22 masih di peringkat perolehan dan pembayaran. Sumbangan wang tunai ini telah digunakan untuk membeli alat-alat kelengkapan dan keperluan perubatan di fasiliti kesihatan KKM.

2. Bagi sumbangan bukan tunai pula, nilai yang diterima oleh KKM bagi tempoh 1 Januari 2020 sehingga 25 Ogos 2021 adalah sebanyak **RM148,523,315.92**. Negeri Selangor mencatatkan nilai penerimaan sumbangan bukan tunai tertinggi iaitu sebanyak RM41,547,732.32 dan diikuti oleh negeri Sabah dengan nilai sebanyak RM34,735,479.31. Sumbangan bukan tunai ini merupakan aset alih dan juga stok yang disumbangkan oleh pertubuhan, syarikat swasta dan orang perseorangan. Antara sumbangan yang diterima adalah peralatan perubatan seperti ventilator, Katil ICU, Mesin Hemodialisis, *Pulse Oxymeter* dan lain-lain serta item *Personal Protective Equipment (PPE)*. Perincian perbelanjaan sumbangan wang tunai COVID-19 ini dan sumbangan bukan tunai adalah seperti di Lampiran.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN ISNARAISSAH MUNIRAH MAJILIS
[KOTA BELUD]**

TARIKH : 22 SEPTEMBER 2021 (RABU)

SOALAN

Minta **MENTERI KESIHATAN** menyatakan :-

- (a) justifikasi di sebalik kenaikan kadar harian jangkitan COVID-19 yang turut selari dengan peningkatan kadar vaksinasi Kebangsaan; dan
- (b) jaminan terhadap keberkesanan (*efficacy*) setiap satu vaksin yang dibekalkan bagi kegunaan umum, termasuk vaksin yang diluluskan oleh NPRA secara bersyarat.

JAWAPAN

Tuan Yang di-Pertua,

1. Antara faktor yang menyumbang kepada peningkatan kadar harian jangkitan COVID-19 ialah terdapat penularan kes COVID-19 di kalangan pesakit COVID-19 tanpa gejala. Daripada kes harian yang dilaporkan, majoriti kes COVID-19 terdiri daripada kategori satu (1) dan dua (2). Kebanyakan pesakit kategori satu (1) tidak menyedari mereka telah dijangkiti dan telah menyebarkan virus COVID-19 kepada orang lain. Selain itu, tahap keberkesanan vaksin dalam bertindak balas dan melindungi penerima vaksin mengambil masa selama dua minggu selepas individu tersebut melengkapkan vaksinasi. Oleh yang demikian,

individu yang telah mendapatkan vaksin digesa supaya kekal mematuhi SOP yang telah ditetapkan oleh MKN.

2. Di samping itu, KKM juga telah mengenalpasti kewujudan empat (4) *Variant of Concern* (VOC) iaitu varian Beta (B.1.351), varian Alpha (B.1.1.7) , varian Gamma (B.1.1.28) dan varian Delta (B.1.617.1) yang turut menyumbang kepada peningkatan kes COVID-19. Daripada 10 Ogos 2021 sehingga 17 Ogos 2021, surveilan genomik oleh Institut Penyelidikan Perubatan (IMR) telah mengenal pasti sebanyak 43 kes varian baharu virus SARS-CoV-2 yang kesemuanya adalah *Variant of Concern* (VOC) iaitu varian Delta (B.1.617.2). Ini menjadikan jumlah kumulatif kes yang dijangkiti oleh virus SARS-CoV-2 yang dikategorikan sebagai VOC dan *Variant of Interest* (VOI) adalah sebanyak 710 kes. Daripada jumlah yang dikesan tersebut, 690 kes adalah VOC manakala 20 kes adalah VOI. Secara keseluruhan, sehingga kini, bagi VOC terdapat sebanyak 467 kes varian Delta, 209 kes varian Beta dan 14 kes varian Alpha manakala bagi VOI terdapat 13 kes varian Theta, empat (4) kes varian Kappa, dan tiga (3) kes varian Eta.

3. Antara sebab lain berlakunya peningkatan kadar harian jangkitan COVID-19 ialah liputan imunisasi yang rendah. Sebagai contoh, pada 25 Ogos 2021, terdapat 22,642 kes baru dilaporkan dengan beberapa negeri merekodkan kes yang tinggi seperti di negeri Sabah, Kedah, Johor dan Kelantan yang masing-masing mempunyai kes sebanyak 3,224 kes, 2,279 kes, 1,832 kes dan 1,424 kes. Bagi empat (4) negeri tersebut, peratus liputan dos lengkap bagi Vaksin COVID-19 adalah masih rendah dengan Sabah sebanyak 23.0%, Kedah sebanyak 27.7%, Johor sebanyak 28.9% dan Kelantan pula sebanyak 25.4% sahaja. Liputan imunisasi yang rendah ini menyebabkan imuniti kelompok tidak dicapai dan seterusnya mendorong kepada peningkatan kes harian di negeri-negeri tersebut.

Tuan Yang di-Pertua,

4. Vaksin yang memenuhi ciri-ciri berikut akan didaftarkan dan digunakan dalam Program Imunisasi COVID-19 Kebangsaan (PICK) iaitu:

(a) Kualiti

Kerajaan menerusi KKM akan membuat penilaian dari segi pengawalan bahan mentah dan proses pengilangan agar vaksin COVID-19 yang dihasilkan mengikut spesifikasi yang telah ditetapkan.

(b) Keberkesanan

Data-data kajian Vaksin COVID-19 tersebut haruslah berupaya untuk merangsang penghasilan antibodi yang mencukupi bagi melawan penyakit COVID-19.

(c) Keselamatan

Data-data kajian menunjukkan Vaksin COVID-19 tersebut tidak mempunyai kesan sampingan yang serius serta manfaat vaksin COVID-19 adalah melebihi daripada risiko-risiko yang diketahui.

5. Penilaian akan dibuat oleh Jawatankuasa Penilaian Produk Bahagian Regulatori Farmasi Negara (NPRA) untuk kelulusan dan Pihak Berkuasa Kawalan Dadah bagi tujuan pendaftaran sebelum ia didaftarkan dan boleh digunakan di Malaysia.

6. Buat masa ini, kesemua vaksin COVID-19 adalah didaftarkan secara pendaftaran bersyarat. Pendaftaran secara bersyarat memerlukan syarikat pemegang pendaftaran untuk mengemukakan analisis data tambahan dan terkini untuk dinilai Bahagian Regulatori Farmasi Negara (NPRA). Ia bagi memastikan keberkesanan dan keselamatan vaksin sentiasa dikemas kini dan perbandingan manfaat-risiko vaksin berkenaan kekal positif (*the benefits outweigh risks*).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : DATO' SERI UTAMA HAJI MUKHRIZ BIN
TUN DR. MAHATHIR [JERLUN]**

TARIKH : 22 SEPTEMBER 2021 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan status terkini pemilikan rumah di bawah Program Perumahan Rakyat (PPR) di negeri Kedah:-

- (a) apakah punca kelewatan penyerahan unit rumah kepada pemilik;
dan
- (b) jumlah rumah PPR di seluruh negara, khususnya di Kedah yang
belum diserahkan

JAWAPAN

Tuan Yang di-Pertua,

- a) Untuk makluman Ahli Yang Berhormat, Kementerian Perumahan dan Kerajaan Tempatan (KPKT) sedang menyelaraskan proses penyerahan unit rumah PPR di negeri Kedah yang mengalami kelewatan penyerahan. Kelewatan ini berpunca daripada pengambilalihan pengurusan PPR oleh KPKT daripada Kerajaan Negeri dan pelaksanaan Perintah Kawalan Pergerakan (PKP) yang menyebabkan urusan berkaitan pengurusan perumahan terjejas.

Justeru, bagi memastikan halatuju pengurusan PPR termasuklah urusan pengisian rumah berjalan dengan lebih berkesan, KPKT telah mengambil langkah proaktif dengan melantik Syarikat Perumahan Negara Berhad (SPNB) bagi mengurus dan menjual unit-unit PPR terpilih kepada pemohon yang layak. Perkara ini telah mendapat kelulusan Jemaah Menteri pada 14 April 2021. Surat tawaran kepada pemohon yang berjaya akan dikeluarkan mulai hujung tahun 2021.

- b) Untuk makluman Ahli Yang Berhormat juga, sehingga Jun 2021 jumlah keseluruhan unit rumah PPR di seluruh negara adalah sebanyak 93,895 unit. Daripada jumlah tersebut sebanyak 84,392 unit (89.88%) telah diserahkan kepada pemohon yang berjaya, manakala baki sebanyak 9,503 unit (10.12%) pula masih dalam peringkat pengisian.

Bagi negeri Kedah, sehingga bulan Jun 2021, jumlah keseluruhan unit rumah PPR adalah sebanyak 3,910 unit. Daripada jumlah ini, sebanyak 2,250 unit (57.54%) telah diserahkan kepada pemohon yang berjaya, manakala baki sebanyak 1,660 unit (42.46%) pula masih dalam peringkat pengisian.

PENGISIAN PPR SELURUH NEGARA SEHINGGA JUN 2021

KATEGORI PPR	BIL. PROJEK	BIL. UNIT	DIDUDUKI	KOSONG
			(UNIT)	
DISEWA	122	79,623	72,877	6,746
DIMILIKI	56	14,272	11,515	2,757
JUMLAH	178	93,895 (100%)	84,392 (89.88%)	9,503 (10.12%)

PENGISIAN PPR NEGERI KEDAH SEHINGGA JUN 2021

KATEGORI PPR	BI. PROJEK	BIL.UNIT	DIDUDUKI	KOSONG
			(UNIT)	
DISEWA	2	1,894	1,529	365
DIMILIKI	6	2,016	721	1,295
JUMLAH	8	3,910 (100%)	2,250 (57.54%)	1,660 (42.46%)

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : DATO' WIRA HAJI AMIRUDDIN BIN HAJI
HAMZAH [KUBANG PASU]**

TARIKH : 22 SEPTEMBER 2021 (RABU)

SOALAN

DATO' WIRA HAJI AMIRUDDIN BIN HAJI HAMZAH [KUBANG PASU]
minta **MENTERI SUMBER MANUSIA** menyatakan kesan positif dari
program kemahiran dan peningkatan kemahiran dari pakej PRIHATIN
memandangkan peratusan kadar pengangguran terus meningkat kepada
4.8% bagi suku kedua tahun 2021.

JAWAPAN

Tuan Yang Di Pertua,

Berdasarkan data terkini Survei Tenaga Buruh oleh Jabatan Perangkaan Malaysia (DOSM), kadar pengangguran pada suku kedua 2021 menurun 0.3 peratus kepada 4.8 peratus berbanding kadar pengangguran pada suku kedua 2020 iaitu 5.1 peratus. Penurunan kadar pengangguran ini membuktikan bahawa pelbagai program bantuan dan pakej rangsangan yang diumumkan oleh Kerajaan sejak pandemik COVID-19 melanda negara telah menunjukkan impak yang positif.

Melalui Pakej Rangsangan Ekonomi Prihatin Rakyat (PRIHATIN), sejumlah 1,571 permohonan telah diterima di bawah program latihan Sistem Insurans Pekerjaan (SIP) dan PenjanaKerjaya. Daripada jumlah tersebut seramai 1,165 peserta telah berjaya menjalani latihan kemahiran dan peningkatan kemahiran.

Penyedia Latihan yang dilantik dikehendaki menawarkan kursus yang mempunyai nilai tambah yang tinggi dan bersesuaian agar dapat meningkatkan kebolehkeraan pekerja. Pertimbangan juga diberikan kepada penyedia latihan yang kompeten dan menawarkan kursus-kursus yang diperlukan oleh majikan mengikut keperluan pasaran buruh semasa.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB PUAN LEOW HSIAD HUI (HULU SELANGOR)

TARIKH : 22 SEPTEMBER 2021 (RABU)

SOALAN

PUAN JUNE LEOW HSIAD HUI [HULU SELANGOR] minta **MENTERI DALAM NEGERI** menyatakan sama ada Kerajaan baru akan meneruskan pembentangan Rang Undang-Undang Suruhanjaya Bebas Tatakelakuan Polis (IPCC) 2020 serta memansuh atau meminda Akta Hasutan 1948.

JAWAPAN

Tuan Yang Di Pertua,

Pada 18 Julai 2019, RUU Suruhanjaya Bebas Aduan Salah Laku Polis (IPCMC) 2019 telah dibentangkan untuk bacaan kali pertama di Parlimen oleh mantan Menteri Undang-Undang di Jabatan Perdana Menteri. Walau bagaimanapun, susulan pertukaran Kerajaan pada 1 Mac 2020, Mesyuarat Jemaah Menteri (MJM) pada 1 April 2020 telah bersetuju supaya tanggungjawab RUU IPCMC diserahkan kepada Kementerian Dalam Negeri (KDN) dan dibentangkan semula di Parlimen setelah mendapat persetujuan Jemaah Menteri.

Susulan dari keputusan MJM tersebut, KDN melalui Jawatankuasa Teknikal telah menjalankan kajian terperinci bagi tujuan penggubalan RUU yang baharu bagi menggantikan RUU IPCMC. RUU yang baharu ini dinamakan semula sebagai RUU Suruhanjaya Bebas Tatakelakuan Polis (IPCC). RUU IPCC telah dibuat bacaan kali pertama pada 26 Ogos 2020 di Dewan Rakyat dan dijangka bacaan kali kedua akan dibaca di sidang Parlimen pada penggal ini.

PDRM akan mengambil tindakan tegas dengan melakukan tangkapan dan pendakwaan terhadap mana-mana individu yang melakukan kesalahan menghina, mempersenda atau memainkan isu-isu Institusi Diraja, agama atau perkauman berdasarkan peruntukan undang-undang sedia ada seperti Akta Hasutan 1948, Kanun Keseksaan dan Akta Komunikasi dan Multimedia 1998. Selain daripada itu, Kementerian Dalam Negeri juga sentiasa mengkaji perundangan tersebut untuk ditambah baik dari semasa ke semasa.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI SALAHUDDIN BIN AYUB
[PULAI]**

TARIKH : 22 SEPTEMBER 2021 (RABU)

SOALAN

DATUK SERI HAJI SALAHUDDIN BIN AYUB minta **MENTERI KESIHATAN** menyatakan apakah terdapat penambahbaikan perkhidmatan kesihatan mental yang ditawarkan kepada rakyat memandangkan ramai yang terjejas kesihatan mental akibat tekanan hidup dalam krisis COVID-19.

JAWAPAN:

Tuan Yang di-Pertua,

1. Kementerian Kesihatan Malaysia mengambil berat tentang masalah kesihatan mental akibat daripada pandemik COVID-19. Secara umumnya faktor-faktor yang boleh menyumbang kepada pemasalahan kesihatan mental masyarakat antaranya adalah masalah atau krisis kewangan, tiada pekerjaan, stres pekerjaan, isu dan permasalahan keluarga seperti masalah hubungan, penceraian, kurang kemahiran keibubapaan, keganasan, penyalahgunaan substans dan faktor persekitaran.
2. Mengambil kira kesan pandemik terhadap kesihatan mental di kalangan masyarakat, KKM turut menambahbaik perkhidmatan kesihatan mental melalui inisiatif berikut:

SOALAN NO : 45

- (i) Mewujudkan Talian Bantuan Sokongan Psikososial di peringkat kebangsaan, negeri dan daerah semasa pandemik bagi memberi bantuan sokongan emosi dan psikososial kepada mereka yang terkesan;
- (ii) Mengukuhkan perkhidmatan kesihatan mental dan psikososial dengan meningkatkan bilangan Pegawai Psikologi yang ditempatkan di setiap daerah atau di klinik kesihatan;
- (iii) Memperkukuhkan program promosi dan pencegahan kesihatan mental di peringkat primer termasuk perkhidmatan saringan, intervensi dan rawatan kesihatan mental bagi meningkatkan pengesanan awal individu yang mengalami masalah kesihatan mental;
- (iv) Menjalankan Kempen Let's TALK Minda Sihat yang dilaksanakan selaras dengan Pelan Publisiti Kesihatan Mental di bawah Agenda Nasional Malaysia Sihat (ANMS). Sehingga Ogos 2021, sebanyak 20 buah Badan Bukan Kerajaan (NGO) telah terlibat dalam aktiviti serta program advokasi kesihatan mental; dan
- (v) Sesi libat urus (*engagement*) bagi menangani isu permasalahan kesihatan mental secara bersepadu telah dilaksanakan bersama pelbagai Kementerian dan agensi seperti Kementerian Pendidikan, Kementerian Pembangunan Wanita Keluarga dan Masyarakat (KPWKM), Kementerian Komunikasi dan Multimedia, Kementerian Belia dan Sukan, Kementerian Dalam Negeri, Kementerian Luar Negeri, Kementerian Perumahan dan Kerajaan Tempatan, JAKIM, Kementerian Pengajian Tinggi, Kementerian Sumber Manusia, PDRM, Jabatan Bomba dan NGO-NGO.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

DARIPADA : TUAN LIM KIT SIANG [ISKANDAR PUTERI]

TARIKH : 22 SEPTEMBER 2021 (RABU)

SOALAN

TUAN LIM KIT SIANG [ISKANDAR PUTERI] minta **MENTERI SUMBER MANUSIA** menyatakan jumlah terkini kehilangan pekerjaan akibat pelaksanaan Perintah Kawalan Pergerakan yang berlarutan terlalu lama, untuk setiap bulan sejak Januari 2021.

JAWAPAN

Tuan Yang Di Pertua,

Untuk makluman Ahli-Ahli Dewan Yang Mulia ini, berdasarkan statistik Sistem Insurans Pekerjaan PERKESO, jumlah pencarum PERKESO yang kehilangan pekerjaan bagi tempoh Januari 2021 hingga 20 Ogos 2021 adalah seramai 43,924 orang.

Pecahan bilangan pencarum PERKESO yang kehilangan pekerjaan mengikut bulan adalah seperti berikut:

- i. Januari 2021 - seramai 8,334 orang
- ii. Februari 2021 - seramai 6,296 orang
- iii. Mac 2021 - seramai 5,788 orang
- iv. April 2021 - seramai 4,963 orang
- v. Mei 2021 - seramai 3,727 orang
- vi. Jun 2021 - seramai 5,621 orang
- vii. Julai 2021 - seramai 6,012 orang
- viii. dan sehingga 20 Ogos 2021 - seramai 3,183 orang.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN OSCAR LING CHAI YEW [SIBU]

TARIKH : 22 SEPTEMBER 2021 (RABU)

SOALAN

Minta **MENTERI KESIHATAN** menyatakan apakah preliminary findings dalam kajian Ivermectin dalam rawatan COVID-19 yang dijalankan di Malaysia.

JAWAPAN:

Tuan Yang di-Pertua,

1. Sehingga Ogos 2021, lebih daripada 350 pesakit Covid-19 telah terlibat dalam Kajian I-TECH. Objektif utama kajian ini adalah untuk menilai keberkesanan ivermectin dalam mencegah pesakit COVID- 19 daripada merosot ke kategori 4 atau 5.
2. Berdasarkan protokol kajian, analisis interim dari segi keselamatan telah dilaksanakan apabila jumlah 30% pesakit direkrut. Setakat ini *Data Safety Monitoring Board* telah memutuskan bahawa tiada kesan sampingan yang signifikan dilaporkan. Seterusnya apabila 50% pesakit telah direkrut, analisa keberkesanan dijalankan. *Data Safety Monitoring Board* telah menyarankan supaya kajian diteruskan sehingga tamat bagi analisa keberkesanan.
3. Kajian I-TECH akan diteruskan sehingga 500 subjek direkrut pada akhir September 2021. Seterusnya hasil kajian dijangka akan dibentangkan kepada *stakeholder* KKM pada bulan Oktober 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : TUAN KHALID BIN ABD SAMAD
[SHAH ALAM]**

TARIKH : 22 SEPTEMBER 2021[RABU]

SOALAN

minta **MENTERI PERUMAHAN DAN KERAJAAN TEMPATAN** menyatakan perincian mengenai semua permohonan pembaikan infrastruktur dan bumbung bagi perumahan kos rendah dan sederhana yang telah dilaksanakan dan menggunakan bajet Kementerian bagi kawasan Parlimen Shah Alam bagi sepanjang tahun 2020 sehingga 2021.

JAWAPAN

Tuan Yang di-Pertua,

1. Untuk makluman Ahli Yang Berhormat, terdapat dua (2) program utama di bawah Kementerian Perumahan dan Kerajaan Tempatan (KPKT) yang berkaitan dengan permohonan untuk pembaikan infrastruktur dan bumbung bagi perumahan kos rendah dan sederhana iaitu Tabung Penyelenggaraan Perumahan Malaysia (TPPM) dan Program Penyelenggaraan Perumahan Malaysia (PPP). TPPM merupakan inisiatif Kerajaan Persekutuan bagi membantu penghuni-penghuni perumahan berstrata kos rendah dan kos sederhana rendah swasta bagi membaik pulih dan menyenggara harta bersama. PPP pula adalah inisiatif Kerajaan Persekutuan bagi membantu penghuni-penghuni perumahan berstrata kos rendah dan kos sederhana rendah awam.

2. Pada tahun 2020, Kerajaan telah meluluskan 14 projek penyelenggaraan di 14 kawasan pemajuan di Shah Alam dengan kos berjumlah RM4,672,297.40 di bawah program TPPM seperti berikut:

- (i) 8 kawasan untuk baik pulih bumbung;
- (ii) 3 kawasan untuk baik pulih tangki air;
- (iii) 1 kawasan untuk baik pulih lif;
- (iv) 1 kawasan untuk baik pulih tangki air dan bumbung; dan
- (v) 1 kawasan untuk baik pulih bumbung, susur tangan (*handrail*) dan pendawaian semula elektrik.

3. Pada tahun 2021, Kerajaan telah meluluskan sebanyak dua (2) projek penyelenggaraan baik pulih tangki air di dua (2) kawasan pemajuan Shah Alam dengan siling peruntukan pembangunan berjumlah RM403,280.00 di bawah program TPPM.

4. Bagi program PPP pula, sebanyak RM1.77 juta telah diperuntukkan untuk tahun 2020, manakala peruntukan bagi tahun 2021 adalah sebanyak RM450 ribu bagi pelaksanaan projek pembaikan dan penyelenggaraan infrastruktur di Shah Alam. Ringkasan kelulusan projek PPP di kawasan parlimen Shah Alam mengikut kawasan pemajuan adalah seperti berikut:

TAHUN	LOKASI	BIL. PROJEK	PERUNTUKAN
2020	PPR Kg. Baru Hicom	4 projek	RM1.77 juta
2021	PPR Kg. Baru Hicom	1 projek	RM450 ribu

5. Untuk makluman Ahli Yang Berhormat juga, sebagai maklumat tambahan, pada tahun 2018, Kerajaan melalui KPKT telah memperuntukkan sebanyak RM9,574,409.34 bagi 12 projek TPPM di Shah Alam, manakala tiada peruntukan diluluskan pada tahun 2019 di bawah TPPM. Bagi program PPP pula, tiada peruntukan diluluskan pada tahun 2018 dan 2019 di Shah Alam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 22 SEPTEMBER 2021 (RABU)

SOALAN

TUAN KESAVAN A/L SUBRAMANIAM minta **MENTERI KESIHATAN** memberikan penjelasan sejak program vaksinasi bermula, kesan sampingan dari mereka-mereka yang telah mengambil vaksin meningkat. Dari masalah kepada jantung, pembekuan darah (thrombosis), demam yang tiada henti, sakit saraf/seizure yang tenat hinggalah kematian. Hampir semua kes-kes di atas akan dicatat sebagai jangkitan COVID-19. KKM sewajarnya menjalankan postmortem yang telus dan terperinci ke atas kes-kes ini untuk mengenalpasti sebab ianya berlaku.

JAWAPAN:

Tuan Yang di-Pertua,

1. Seperti vaksin dan ubat-ubatan yang lain, vaksin COVID-19 juga boleh menyebabkan kesan sampingan. Semenjak program vaksinasi bermula sehingga sekarang, bilangan kesan sampingan yang dilaporkan kepada Bahagian Regulatori Farmasi Negara (NPRA) turut meningkat selaras dengan peningkatan bilangan dos vaksin yang diberikan kepada penduduk Malaysia. Walau bagaimanapun, kadar kesan sampingan berbanding dos yang diberikan ini menunjukkan *trend* menurun sejajar dengan peralihan daripada Fasa 2 kepada Fasa 3 Program Vaksinasi Kebangsaan.

2. Kesan sampingan seperti masalah jantung, pembekuan darah (*thrombosis*), demam berpanjangan dan sakit saraf, *seizure* serta kematian ada dilaporkan namun dengan kadar yang amat rendah. Laporan kesan sampingan yang memerlukan kemasukan ke hospital atau kematian akan dikategorikan sebagai kes serius mengikut klasifikasi Pertubuhan Kesihatan Dunia (WHO) dan akan disiasat lanjut. Walau bagaimanapun, kes-kes tersebut tidak akan dicatatkan sebagai kes jangkitan COVID-19.

3. Bagi kes-kes kematian, *post-mortem* akan dijalankan selepas mendapat persetujuan daripada waris pesakit. Laporan *post-mortem* yang lengkap adalah dokumen penting bagi menjalankan siasatan kes dan menentukan sebab kematian pesakit. Ianya juga akan dirujuk Jawatankuasa Farmakovigilans Khas Vaksin COVID-19 (JFK) yang ditubuhkan untuk menilai secara terperinci dan mengesahkan hubung-kait kesan sampingan serius termasuk kematian, dengan vaksin yang diambil. Penilaian terperinci oleh JFK setakat ini mendapati bahawa kes-kes kematian yang berlaku tiada kaitan secara langsung dengan pengambilan vaksin COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 22 SEPTEMBER 2021 (RABU)

SOALAN

Minta **MENTERI KESIHATAN** menyatakan kapasiti maksimum, kadar kemasukan kes ke wad, jumlah penggunaan katil ICU dan kecemasan di HTAR, Klang. Apakah nisbah pembantu perubatan, jururawat dan doktor secara berasingan kepada pesakit COVID-19 serta bilangan pesakit COVID-19 menerima rawatan mengikut kategori dan bilangan kematian di HTAR, Klang.

JAWAPAN:

Tuan Yang di-Pertua,

1. Hospital Tengku Ampuan Rahimah (HTAR) telah dijadikan hospital *hybrid* bagi perawatan COVID-19 semenjak 19 Januari 2021.
2. Katil bukan kritikal bagi pesakit disyaki COVID-19 (PUI) dan pesakit COVID-19 telah ditingkatkan daripada 200 katil pada Januari 2021 kepada kapasiti maksima 803 pada bulan Ogos 2021 apabila jumlah kemasukan kes mencecah sehingga 300 kes pada penghujung bulan Julai 2021.
3. Kapasiti katil kritikal bagi pesakit COVID-19 juga telah ditingkatkan daripada 18 katil pada awal bulan Mei 2021 kepada kapasiti maksima 66 katil rawatan kritikal sehingga Ogos 2021 dengan menukar fungsi (*repurpose*) wad biasa kepada wad rawatan kritikal bagi menampung

keperluan pesakit yang memerlukan rawatan intensif.

4. Di samping itu, bagi menampung pertambahan pesakit COVID-19 yang mendapatkan rawatan di Jabatan Kecemasan, HTAR telah mewujudkan *Disaster Ward* dengan kapasiti 278 katil di bangunan Kompleks Rawatan Ibu Dan Bayi (KRIBA) dan menukar fungsi Bangunan Kompleks Rawatan Harian menjadi sebahagian daripada Jabatan Kecemasan dengan kapasiti 150 katil. Pihak MERCY juga telah membantu dengan membuka fasiliti hospital medan berkapasiti 100 katil bagi meningkatkan kapasiti katil kecemasan di HTAR.

5. Nisbah kakitangan perubatan kepada pesakit di Jabatan Kecemasan adalah sebanyak 1:10 bagi pembantu perubatan, 1:20 bagi jururawat dan 1:40 bagi pegawai dan pakar perubatan. Bagi *Disaster ward* pula, nisbah kakitangan perubatan kepada pesakit adalah 1:10 bagi jururawat dan 1:25-30 bagi pegawai dan pakar perubatan. Untuk wad COVID, nisbah jururawat kepada pesakit adalah 1:10 dan nisbah pegawai perubatan kepada pesakit adalah 1:15 manakala nisbah pakar perubatan kepada pesakit adalah 1:25.

6. Semenjak HTAR dijadikan hospital hybrid COVID-19 sehingga 25 Ogos 2021, seramai 7663 pesakit COVID-19 telah dimasukkan dan dirawat di hospital tersebut. Semasa waktu peningkatan kes yang paling tinggi di Lembah Klang iaitu di penghujung bulan Julai 2021, jumlah pesakit COVID-19 yang paling tinggi pernah dicatatkan oleh HTAR ialah sebanyak 1,115 sehari, dengan 18 pesakit kategori 1, 40 pesakit kategori 2, 73 pesakit kategori 3, 887 pesakit kategori 4 dan 97 pesakit kategori 5.

7. Kadar kematian kumulatif di HTAR semenjak Januari 2021 adalah sebanyak 1,590 orang, dengan jumlah tertinggi dicatatkan pada bulan Julai 2021 sebanyak 771 orang.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN RAMKARPAL SINGH A/L KARPAL
SINGH (BUKIT GELUGOR)**

TARIKH : 22 SEPTEMBER 2021 (RABU)

SOALAN

TUAN RAMKARPAL SINGH A/L KARPAL SINGH [BUKIT GELUGOR]
minta **PERDANA MENTERI** menyatakan sama ada Kerajaan akan
memansuhkan atau meminda Akta Hasutan, 1948.

JAWAPAN

Tuan Yang Di Pertua,

Kementerian Dalam Negeri (KDN) melalui penguatkuasaan pihak Polis Diraja Malaysia (PDRM) sentiasa komited dalam mendukung hak kebebasan bersuara, selagi mana mematuhi peraturan-peraturan yang telah ditetapkan. PDRM akan mengambil tindakan tegas dengan melakukan tangkapan dan pendakwaan terhadap mana-mana individu yang melakukan kesalahan menghina, mempersenda atau memainkan isu-isu Institusi Diraja, agama atau perkauman berdasarkan peruntukan undang-undang sedia ada seperti Akta Hasutan 1948, Kanun Keseksaan dan Akta Komunikasi dan Multimedia 1998. Selain daripada itu, Kementerian Dalam Negeri juga sentiasa mengkaji perundangan tersebut untuk ditambah baik dari semasa ke semasa.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 22 SEPTEMBER 2021 (RABU)

SOALAN

DR. KELVIN YII LEE WUEN minta **MENTERI KESIHATAN** menyatakan jumlah pesakit yang mengalami kesan sampingan yang serius, yang memerlukan rawatan jangka masa panjang, dan jumlah yang meninggal disebabkan vaksinasi COVID-19.

JAWAPAN:

Tuan Yang di-Pertua,

1. Seperti vaksin dan ubat-ubatan lain, vaksin COVID-19 juga turut boleh menyebabkan kesan sampingan ke atas pengguna. Walau bagaimanapun, kebanyakan kesan sampingan yang dilaporkan adalah ringan dan sederhana seperti sakit di tempat suntikan, demam, pening serta keletihan yang biasanya akan pulih dalam tempoh masa beberapa hari sahaja.
2. Sehingga 23 Julai 2021 yang melibatkan pemberian 15.2 juta dos vaksin COVID-19, terdapat 784 laporan kesan sampingan serius yang telah diterima oleh Pusat Pemantauan Kesan Advers Kebangsaan di Bahagian Regulatori Farmasi Negara (NPRA). Ini adalah bersamaan 0.05 laporan bagi setiap 1,000 dos diberi. Kes-kes serius ini dimasukkan ke hospital untuk pemantauan dan rawatan lanjut yang lazimnya bagi tempoh beberapa hari sahaja.
3. Semua kes yang serius termasuk kes kematian seterusnya disiasat secara menyeluruh dan terperinci oleh fasiliti kesihatan yang berkenaan. Laporan penyiasatan seterusnya diserahkan kepada Jawatankuasa Farmakovigilans Khas Vaksin COVID-19 (JFK) untuk penilaian kasualiti antara kesan sampingan dan vaksin diambil. Setelah penilaian terperinci oleh JFK, adalah didapati bahawa tiada kaitan secara langsung akibat daripada penggunaan vaksin COVID-19 yang melibatkan kes-kes kematian ini.
4. Daripada 784 laporan kesan sampingan serius yang diterima, 232 laporan melibatkan kes-kes kematian daripada kalangan penerima vaksin COVID-19. Namun, tiada kematian yang telah dilaporkan disebabkan vaksin.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : TUAN SANISVARA NETHAJI RAYER A/L
RAJAJI [JELUTONG]**

TARIKH : 22 SEPTEMBER 2021 (RABU)

SOALAN

TUAN SANISVARA NETHAJI RAYER A/L RAJAJI [JELUTONG] minta **MENTERI SUMBER MANUSIA** menyatakan berapa banyak bilangan majikan yang telah diambil tindakan akibat menghentikan pekerja-pekerja sejak Perintah Kawalan Pergerakan mula dikuatkuasakan dari tahun 2020 sehingga sekarang.

JAWAPAN

Tuan Yang Di Pertua,

Kementerian Sumber Manusia melalui Jabatan Tenaga Kerja sentiasa bertindak proaktif dalam membantu dan mengesan pekerja tempatan yang terlibat dengan pemberhentian pekerja yang disebabkan oleh pandemik COVID -19. Pada tahun 2020 sehingga Julai 2021, sebanyak 5,095 majikan memberhentikan seramai 141,191 pekerja di Semenanjung Malaysia. Manakala bagi negeri Sarawak, sebanyak 509 majikan terlibat dengan pemberhentian melibatkan seramai 8,996 orang pekerja dalam tempoh yang sama.

Di negeri Sabah pula, 355 majikan terlibat dalam pemberhentian seramai 5,706 pekerja dalam tempoh 2020 hingga September 2021 yang melibatkan sektor penginapan dan rangkaian perkhidmatan makanan serta minuman, sektor pembuatan, sektor pembinaan dan sektor pentadbiran dan khidmat sokongan.

KSM telah melaksanakan tindakan pemantauan secara rapi bagi memastikan hak-hak pekerja terjamin dan kebajikan tidak diabaikan. Bagi tujuan tersebut, majikan diwajibkan untuk melengkap dan mengemukakan Borang Pemberhentian (PK) dalam tempoh tiga puluh (30) hari sebelum tindakan pemberhentian dilakukan sebagaimana Seksyen 63, Akta Kerja 1955 [Akta 265].

Ini adalah bertujuan untuk:

- i) memastikan hak-hak pekerja dibayar mengikut undang-undang dari segi pembayaran faedah penamatan kerja, notis penamatan dan lain-lain faedah kewangan;
- ii) memastikan majikan mengikuti Garis Panduan Pemberhentian Pekerja yang dikeluarkan oleh Jabatan JTKSM dalam melaksanakan pemberhentian pekerja; dan

SOALAN NO : 54

- iii) membantu penempatan semula pekerja-pekerja yang telah diberhentikan berdaftar dengan *MYFutureJobs* atau meningkatkan kemahiran baru melalui jabatan dan agensi di bawah Kementerian.

Majikan yang gagal mematuhi peruntukan undang-undang yang ada atau melanggar peruntukan di bawah akta, apabila sabit kesalahan, boleh dikenakan denda tidak melebihi RM10,000 bagi setiap kesalahan.

Untuk makluman Dewan Yang Mulia, sehingga kini tiada tindakan pendakwaan yang dibuat ke atas majikan kerana majikan yang memberhentikan pekerja mematuhi peruntukan di bawah seksyen ini.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEMPATBELAS**

PERTANYAAN : JAWAB LISAN

DARIPADA : YB DATO' NGEH KOO HAM (BERUAS)

TARIKH : 22 SEPTEMBER 2021 (RABU)

SOALAN

DATO' NGEH KOO HAM [BERUAS] minta **MENTERI DALAM NEGERI** menyatakan sama ada Kerajaan akan memberi jaminan tidak akan mengambil tindakan terhadap warga asing tidak berdokumen atau kebenaran mereka berada di Malaysia telah tamat tempoh jika mereka keluar untuk mendapat suntikan vaksin COVID-19.

JAWAPAN

Tuan Yang Di Pertua,

Untuk makluman Ahli Yang Berhormat, Kerajaan mensasarkan sebanyak 80% daripada populasi di Malaysia termasuk individu bukan warganegara untuk diberikan vaksin COVID-19 bagi mencapai imuniti kelompok dan mendapatkan perlindungan optimum daripada jangkitan COVID-19. Pelaksanaan vaksinasi COVID-19 kepada penduduk di Malaysia adalah berdasarkan kepada hala tuju Program Imunisasi COVID-19 Kebangsaan (PICK) yang diterajui oleh Kementerian Sains, Teknologi dan Invoasi melalui Pasukan Petugas Imunisasi COVID-19 (CITF).

Merujuk kepada strategi vaksinasi kepada pendatang asing tanpa izin (PATI) di seluruh negara, Kerajaan telah bersetuju untuk untuk melaksanakan PICK-PATI melalui suatu prosedur operasi standard (SOP) yang diputuskan oleh Jemaah Menteri pada 30 Julai 2021. Antara lain, Kerajaan bersetuju bahawa PATI perlu didokumen dan direkodkan maklumatnya berdasarkan kepada penguatkuasaan Pekeliling Ketua Pengarah Kesihatan Bilangan 10 Tahun 2001. Pekeliling ini menetapkan kewajipan pemberi perkhidmatan kesihatan untuk memaklumkan kepada pihak berkuasa keselamatan tentang kehadiran PATI di premis kesihatan.

Selain itu, strategi kerjasama dengan agensi-agensi dan pusat swasta yang dibenarkan adalah amat penting bagi menggalakkan PATI untuk berdaftar secara sukarela untuk mendapatkan suntikan vaksin COVID-19. Penglibatan agensi-agensi dan pusat swasta yang dibenarkan sebagai barisan hadapan yang berhubung dengan PATI didapati lebih efektif untuk berunding dan mendekati golongan berkenaan bagi membina kepercayaan (*trustworthiness building*) PATI terhadap PICK.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN SU KEONG SIONG (KAMPAR)]

TARIKH : 22 SEPTEMBER 2021 (RABU)

SOALAN

TUAN SU KEONG SIONG minta **MENTERI KESIHATAN** menyatakan status terkini cadangan pembinaan Hospital Kampar yang telah diperuntukkan dan diluluskan oleh Kerajaan Pakatan Harapan sejak Oktober 2019. Adakah Kerajaan telah membatalkan pembinaan Hospital Daerah Kampar tersebut.

JAWAPAN:

Tuan Yang di-Pertua,

1. Kementerian Kesihatan Malaysia (KKM) telah menerima tiga cadangan lokasi tapak bagi pembinaan Hospital Kampar yang baharu. Namun begitu, laporan siasatan tanah ke atas tapak-tapak yang dicadangkan mendapati tapak tersebut tidak sesuai untuk pelaksanaan projek pembangunan Hospital Kampar baharu kerana sebahagian tanah adalah lombong dan berpaya. Sehubungan itu, KKM sedang mengenal pasti tapak baharu yang bersesuaian untuk membangunkan Hospital Kampar baharu.

2. Selain itu, untuk makluman YB, pihak Universiti Tunku Abdul Rahman (UTAR) juga sedang membangunkan sebuah hospital dengan kapasiti 350 katil di Kampar, Perak. Hospital ini dijangka akan mula beroperasi pada pertengahan tahun 2022 dengan menawarkan perkhidmatan perubatan pakar serta perkhidmatan kecemasan dan trauma.

3. Susulan itu, pihak UTAR telah mengemukakan cadangan untuk berkolaborasi dengan KKM dalam menyediakan perkhidmatan kesihatan di Hospital UTAR. Cadangan kerjasama KKM-UTAR ini sedang dalam pertimbangan KKM memandangkan kedudukan Hospital UTAR yang dibangunkan terletak berdekatan Hospital Kampar sedia ada dan dapat menyediakan peluang untuk menggembelng tenaga kerja perubatan bagi meningkatkan akses perkhidmatan dan peluang latihan.
4. Untuk makluman Ahli Yang Berhormat juga, Hospital Kampar sedia ada mempunyai kapasiti sebanyak 68 katil. Hospital Kampar merupakan salah satu hospital atau komponen dalam Hospital Kluster Ipoh dengan Hospital Raja Permaisuri Bainun (Hospital Berpakar Major) sebagai *Lead Hospital*.
5. Susulan penubuhan Hospital Kluster Ipoh ini, liputan perkhidmatan kepakaran di Hospital Kampar telah dipertingkatkan secara berfasa melalui kehadiran pakar perubatan yang datang memberi perkhidmatan kepakaran bagi pesakit-pesakit wad dan di klinik pakar mengikut ketetapan jadual. Antara perkhidmatan kepakaran yang disediakan ialah psikiatri, pembedahan, obstetriks dan ginekologi, paediatrik dan ortopedik.
6. KKM juga akan merancang pembangunan dan perkembangan perkhidmatan di Hospital Kampar bagi memastikan kualiti penyampaian perkhidmatan kesihatan kepada rakyat di Kampar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 22 SEPTEMBER 2021 [RABU]

SOALAN

minta **MENTERI PERUMAHAN DAN KERAJAAN TEMPATAN**
menyatakan:

- a) status terkini pelaksanaan Program Pembiayaan Sewa untuk Milik (RTO) yang telah diperuntukkan dalam Belanjawan 2021; dan
- b) jangka masa KPKT menggubal satu Akta Sewaan Kediaman dan model yang digunakan untuk menggubal akta ini.

JAWAPAN

Tuan Yang di-Pertua,

- (a) Untuk makluman Ahli Yang Berhormat, Skim Pembiayaan Sewa untuk Milik (Rent-to-Own, RTO) yang diumumkan dalam Belanjawan Tahun 2021 adalah inisiatif kolaborasi Kementerian Kewangan, Kementerian Perumahan dan Kerajaan Tempatan melalui Perbadanan PR1MA Malaysia (PR1MA) bersama institusi kewangan terpilih bagi menawarkan skim pembiayaan perumahan alternatif kepada golongan M40.

Skim RTO ini dirancang untuk membantu mengurangkan beban kewangan rakyat yang ingin memiliki rumah semasa pemulihan daripada krisis COVID-19. Ianya ditawarkan kepada bakal pembeli yang tidak layak mendapatkan pembiayaan daripada mana-mana institusi kewangan. Pembeli mempunyai pilihan untuk menyewa selama 5 tahun dahulu dengan kadar sewa yang berpatutan sebelum membeli rumah tersebut. Dalam tempoh sewaan, bakal pembeli berpeluang untuk memperbaiki kedudukan kewangan mereka sehingga mereka boleh mendapatkan pinjaman bank di kemudian hari.

Skim RTO ini akan dibuka kepada pembeli rumah pertama untuk semua rumah PR1MA yang sedang dan telah siap dibina di seluruh negara. Pihak PR1MA kini sedang dalam peringkat perbincangan lanjut dengan Kementerian Kewangan dan institusi kewangan terpilih bagi memuktamadkan deraf perjanjian skim RTO. Skim RTO ini dijangka akan dilancarkan pada suku terakhir tahun 2021.

- (b) Untuk makluman Ahli Yang Berhormat seterusnya, kajian dan penggubalan Akta Sewaan Kediaman/ *Residential Tenancy Act* (RTA) telah bermula pada Jun 2019 selepas diluluskan menerusi Bajet 2019. Rang Undang-Undang (RUU) ini antara lain bertujuan untuk melindungi hak penyewa dan pemilik kediaman. Pada masa kini, perjanjian penyewaan kediaman disediakan menggunakan tatacara Akta Kontrak

1949. Dokumen tersebut bersifat umum dan tidak melindungi sepenuhnya kepentingan serta hak penyewa dan tuan rumah. Cadangan penggubalan RUU RTA telah pun dibentangkan dan diluluskan dalam Mesyuarat Jemaah Menteri pada 23 Jun 2021.

Status terkini, KPKT sedang menyemak draf awal RUU RTA sebelum dihantar kepada Jabatan Peguam Peguam Negara (AGC) untuk kelulusan. Seterusnya, RUU Akta Sewaan Kediaman ini dijangka akan dibentangkan di Parlimen pada sesi persidangan pertama tahun 2022.

Untuk makluman Ahli Yang Berhormat, KPKT melalui Jabatan Perumahan Negara (JPN) telah mengkaji undang-undang berkaitan dari Jerman, United Kingdom dan Australia serta *Rental Housing Act* dari Afrika Selatan. Rang Undang-Undang Akta Sewaan Kediaman yang dicadangkan ini adalah berdasarkan model *Residential Tenancies Act 2010 (New South Wales)* Australia kerana akta ini mempunyai undang-undang pembangunan perumahan dan sewaan kediaman yang lengkap dan mampu melindungi kepentingan pemilik kediaman dan penyewa.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB SU KEONG SIONG (KAMPAR)

TARIKH : 22 SEPTEMBER 2021 (RABU)

SOALAN

TUAN SU KEONG SIONG [KAMPAR] minta **MENTERI DALAM NEGERI** menyatakan secara terperinci jumlah permohonan kewarganegaraan di bawah Perkara 15A, 15(2) dan 19(1) Perlembagaan Malaysia yang tertangguh dan/atau belum dalam proses pertimbangan dari tarikh Mac 2020 sehingga Ogos 2021.

JAWAPAN

Tuan Yang Di Pertua,

Jumlah permohonan kewarganegaraan Malaysia di bawah Perkara 15A, 15(2) dan 19(1) Perlembagaan Persekutuan bagi 1 Mac 2020 hingga 25 Ogos 2021 adalah sebanyak 2,969 permohonan. Daripada jumlah tersebut, sebanyak 2,808 masih di dalam proses.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 22 SEPTEMBER 2021 (RABU)

SOALAN

TUAN NIK NAZMI BIN NIK AHMAD [SETIAWANGSA] minta **MENTERI SUMBER MANUSIA** menyatakan inisiatif yang diambil dalam memastikan pekerja ekonomi gig tidak dieksploitasi oleh syarikat teknologi gergasi.

JAWAPAN

Tuan Yang Di Pertua,

Pada masa ini, Kerajaan telah mengambil pelbagai inisiatif dalam memastikan pekerja ekonomi gig mendapat perlindungan sebaiknya. Antaranya dengan memberi perlindungan keselamatan sosial kepada pekerja gig ekonomi seperti penghantar makanan dan *e-hailing services* sepertimana yang telah diperuntukkan di bawah Akta Keselamatan Sosial Pekerjaan Sendiri 2017 [Akta 789] sekiranya mereka mencarum di bawah Akta tersebut.

Selain itu, Kerajaan juga telah menyediakan Dana Padanan Bagi Platform Ekonomi Gig (PenjanaGig) sepertimana yang diumumkan oleh YAB Perdana Menteri pada 5 Jun 2020 melalui Pelan Jana Semula Ekonomi Negara (PENJANA). Inisiatif ini bagi menjamin keselamatan sosial dan kebajikan golongan Orang Bekerja Sendiri (OBS) yang melibatkan aktiviti pekerjaan ekonomi gig.

Sejak Perintah Kawalan Pergerakan (PKP) dilaksanakan, berlaku peningkatan terhadap permintaan ke atas perkhidmatan dan pekerjaan berlandaskan ekonomi gig dan seterusnya meningkatkan risiko kemalangan. Ini termasuklah individu yang terlibat untuk menjalankan sesuatu tugas atau kerja melalui platform penyedia perkhidmatan atas aplikasi digital untuk mendapat upah seperti GrabCar, FoodPanda, Lalamove dan Bungkusit.

Kementerian juga telah mengadakan beberapa siri perbincangan dengan penyedia perkhidmatan gig ekonomi bagi membincangkan faedah dan perlindungan yang boleh dilindungi melalui undang-undang perburuhan tanpa menjejaskan ciri-ciri yang menjadi daya tarik gig ekonomi termasuk fleksibiliti dalam pekerjaan ini.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 22 SEPTEMBER 2021 (RABU)

SOALAN

DATUK IGNATIUS DARELL LEIKING [PENAMPANG] minta **MENTERI SUMBER MANUSIA** menyatakan apakah perkembangan pelaksanaan Program Subsidi Upah (PSU) 4.0, Penjana Kerjaya 3.0, dan Elaun Mencari Pekerjaan (EMP SIP PRIHATIN 2.0) sejak Malaysia sedang mengalami kadar pengangguran sebanyak 4.8% iaitu kadar pengangguran yang amat tinggi dan membimbangkan.

JAWAPAN

Tuan Yang Di Pertua,

Perkembangan program-program yang dilaksanakan oleh Kerajaan melalui PERKESO di bawah Pakej Perlindungan Rakyat Dan Pemulihan Ekonomi (PEMULIH) adalah seperti berikut:

Program Subsidi Upah 4.0 (PSU 4.0) yang bermula pada 1 Ogos sehingga 30 Oktober 2021 merupakan bantuan kewangan kepada majikan yang terkesan dari segi ekonomi akibat pandemik COVID-19 supaya dapat mengekalkan pekerja mereka. Berdasarkan statistik Sistem Insurans Pekerjaan (SIP) sehingga 20 Ogos 2021 PERKESO telah menerima

sejumlah **99,114 permohonan** PSU daripada majikan yang melibatkan **1.21 juta orang pekerja** dengan jumlah bantuan kewangan sebanyak **RM248.4 juta**. Secara tidak langsung, **kadar pemberhentian pekerja menurun iaitu sebanyak 46,093 orang bagi tempoh Januari 2021** sehingga 21 Ogos 2021 berbanding 107,024 orang pada tahun 2020.

PenjanaKerjaya 3.0 adalah program yang bertujuan mewujudkan peluang pekerjaan baharu dan mengurangkan pengangguran dalam kalangan pekerja tempatan. Berdasarkan statistik SIP, sebanyak **3,568 permohonan** daripada majikan yang melibatkan **16,189 jumlah pekerja** telah diterima. Daripada permohonan tersebut, sebanyak 1,747 permohonan majikan telah diluluskan yang melibatkan 5,215 orang pekerja dengan jumlah pembayaran RM2.45 juta.

Program SIP PRIHATIN 2.0 yang dilancarkan pada 15 Julai yang lalu telah ditambah baik dengan perluasan pemberian Elaun Mencari Pekerjaan (EMP) kepada individu yang menganggur, graduan baharu, lepasan sekolah dan pekerja sektor tidak formal. Sejak dilancarkan, PERKESO telah menerima sejumlah **1,589 permohonan** setakat 20 Ogos 2021.

Melalui program-program yang dilaksanakan di bawah PEMULIH ini dijangka sedikit sebanyak membantu majikan mengekalkan pekerja mereka dan golongan pencari kerja turut dibantu.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN WONG CHEN (SUBANG)

TARIKH : 22 SEPTEMBER 2021 (RABU)

SOALAN

TUAN WONG CHEN [SUBANG] minta **MENTERI DALAM NEGERI** menyatakan :

- (a) status Rang Undang-Undang Suruhanjaya Bebas Tatakelakuan Polis (IPCC) dan reformasi utama; dan
- (b) memberikan satu garis masa yang jelas untuk membentangkan Rang Undang-Undang tersebut.

JAWAPAN

Tuan Yang Di Pertua,

Pada 18 Julai 2019, RUU Suruhanjaya Bebas Aduan Salah Laku Polis (IPCMC) 2019 telah dibentangkan untuk bacaan kali pertama di Parlimen oleh mantan Menteri Undang-Undang di Jabatan Perdana Menteri. Walau bagaimanapun, susulan pertukaran Kerajaan pada 1 Mac 2020, Mesyuarat Jemaah Menteri (MJM) pada 1 April 2020 telah bersetuju supaya tanggungjawab RUU IPCMC diserahkan kepada Kementerian Dalam Negeri (KDN) dan dibentangkan semula di Parlimen setelah mendapat persetujuan Jemaah Menteri.

Susulan dari keputusan MJM tersebut, KDN melalui Jawatankuasa Teknikal telah menjalankan kajian terperinci bagi tujuan penggubalan RUU yang baharu bagi menggantikan RUU IPCMC. RUU yang baharu ini dinamakan semula sebagai RUU Suruhanjaya Bebas Tatakelakuan Polis (IPCC). RUU IPCC telah dibuat bacaan kali pertama pada 26 Ogos 2020 di Dewan Rakyat dan dijangka bacaan kali kedua akan dibaca di sidang Parlimen pada penggal ini.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 22 SEPTEMBER 2021 (RABU)

SOALAN

DR. KELVIN YII LEE WUEN minta **MENTERI KESIHATAN** menyatakan mengenai pelan Kementerian untuk memperkenalkan COVID-19 “booster dose” dan juga vaksinasi kanak-kanak dan juga satu “advisory” untuk penggunaan “neutralising antibody test” yang semakin banyak di pasaran swasta.

JAWAPAN

Tuan Yang di-Pertua,

1. YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19.
2. Keutamaan akan diberikan kepada kumpulan yang berisiko tinggi terlebih dahulu seperti anggota barisan hadapan kesihatan, pesakit kurang daya tahan imun (*immunocompromised*), warga tua dengan komorbiditi dan individu yang tinggal atau bekerja di pusat jagaan jangka panjang (*long-term care facilities*). Pemberian dos ketiga vaksin COVID-19 akan dilaksanakan apabila liputan imunisasi populasi dewasa di seluruh negara melebihi 80%. Bagi tujuan tersebut, panel pakar perubatan dan kesihatan sedang membangunkan garis panduan pelaksanaan pemberian dos ketiga dan pada yang sama permohonan

untuk mendapatkan kelulusan Pihak Berkuasa Kawalan Dadah sedang dilaksanakan.

3. Berhubung program vaksinasi kepada anak-anak berumur 18 tahun ke bawah, program tersebut telah dimulakan di Sarawak pada 8 September dan Wilayah Persekutuan Labuan pada 11 September memandangkan kedua-dua negeri telah mencapai 80% liputan imunisasi COVID-19 dalam kalangan dewasa. Keutamaan diberikan kepada remaja berumur 16 dan 17 tahun dengan komorbid, diikuti dengan remaja berumur 16 dan 17 tahun yang sihat dan seterusnya akan diperluaskan kepada remaja berumur 12 hingga 15 tahun. Bagi negeri-negeri lain, program akan dimulakan seawal 15 September 2021, seperti mana terkandung dalam Surat Pekeliling Ketua Pengarah Kesihatan Malaysia Bil. 13 Tahun 2021: Perlaksanaan PICK di kalangan Remaja tertentu berumur 12 hingga 17 tahun.

4. Pada 20 September 2021, ***Kick-Off*** Program Imunisasi COVID-19 Kebangsaan remaja (PICK Remaja) telah dilaksanakan di Sekolah Menengah Kebangsaan Putrajaya Presint 8 (1) - SMK Putrajaya Presint 8 (1).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS TAHUN 2021**

PERTANYAAN : JAWAB LISAN

**DARIPADA : TUAN M. KULASEGARAN
[IPOH BARAT]**

TARIKH : 22 SEPTEMBER 2021 (RABU)

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan langkah dan dasar untuk mengawal pekerja asing dalam sektor perindustrian dan sektor lain supaya tidak berlaku diskriminasi kepada pekerja tempatan, terutamanya semasa kadar pengangguran yang amat tinggi.

JAWAPAN

Tuan Yang Di Pertua,

Dasar Kerajaan mengenai penggajian pekerja adalah dengan memberi keutamaan kepada pencari pekerja tempatan. Kerajaan sentiasa berusaha memastikan pencari kerja tempatan tidak dinafikan hak mereka untuk bekerja dalam sektor-sektor yang dibenar menggaji pekerja asing. Penggajian pekerja asing hanya dibenarkan bagi jawatan yang tidak dapat diisi oleh pekerja tempatan dalam sektor-sektor yang diluluskan sahaja.

Dalam usaha mengurangkan kebergantungan kepada guna tenaga asing, Kerajaan masih berpegang kepada dasar-dasar sedia ada yang memberikan keutamaan kepada penggajian pekerja tempatan iaitu:

- i. menggalakkan sektor-sektor berintensifkan buruh beralih kepada penggunaan mekanisasi dan automasi bagi mengurangkan kebergantungan terhadap pekerja asing dan mewujudkan peluang pekerjaan yang memerlukan kemahiran;
- ii. penggajian pekerja asing dari mana-mana negara sumber hendaklah berdasarkan kepada keperluan sebenar industri dan sektor-sektor yang dibenarkan sahaja (*real industrial demand*);
- iii. melaksanakan *multi-tier levy* mulai 1 Januari 2022 di mana pengambilan pekerja asing adalah berdasarkan *Dependency Ratio Ceiling* (DRC) iaitu nisbah antara pekerja tempatan dan pekerja asing;
- iv. syarat-syarat permohonan pekerja asing diperketatkan dari segi penetapan nisbah pengambilan berdasarkan komposisi pekerja tempatan dan pekerja asing;

SOALAN NO : 63

- v. hanya majikan yang berkeupayaan (*genuine*) dan mematuhi standard perburuhan seperti pematuhan gaji minimum, menyediakan kemudahan penginapan berserta kemudahan asas dan tiada rekod pelanggaran kes buruh sahaja dipertimbangkan kelulusan pekerja asing. Keupayaan majikan akan ditentukan melalui proses saringan dan pemeriksaan Jabatan Tenaga Kerja (JTK);
- vi. mengutamakan *exit policy* penggajian pekerja asing dengan menyediakan pelan latihan kemahiran kepada pekerja tempatan, memberi keutamaan kepada mekanisme *Industrialised Building System* (IBS) dalam sektor pembinaan, peralihan kepada intensif mekanisasi dan automasi, restoran berkonsepkan layan diri (*self-service*) dan sebagainya;
- vii. program *Technical and Vocational Education and Training* (TVET) untuk warga tempatan diperkasakan lagi bagi melahirkan individu berkemahiran tinggi selaras dengan hasrat negara untuk beralih daripada industri berintensifkan buruh kepada *high end industry*; dan
- viii. pembiayaan latihan di bawah Pembangunan Sumber Manusia Berhad (PSMB) melalui caruman levi majikan untuk melatih semula pekerja bagi meningkatkan kemahiran pekerja.

Pada masa yang sama, beberapa dasar baharu atau lebih sesuai dinyatakan sebagai memperkukuhkan sebahagian dasar sedia ada juga telah dilaksanakan oleh Kerajaan, antaranya seperti:

- i. mewajibkan pengiklanan kekosongan jawatan untuk tempoh tidak kurang dari 30 hari di portal *MyFutureJobs* bagi tujuan pengambilan pekerja asing dan pegawai dagang (ekspatriat). Sekiranya tiada pengisian dari kalangan pencari pekerja tempatan dalam tempoh tersebut, barulah majikan dibenarkan membuat permohonan pengambilan pekerja asing dan pegawai dagang;

- ii. jawatan petugas barisan hadapan (*frontliners*) tidak dibenarkan kepada pekerja bukan warganegara; dan
- iii. melalui inisiatif di bawah Pelan Jana Semula Ekonomi Negara (PENJANA), lebih dari 70,000 pelatih mendapat manfaat melibatkan komitmen bernilai RM422.75 juta menerusi pelbagai skim seperti Skim Penempatan dan Latihan, Skim Pembangunan B40, Skim Gerak Insan Gemilang, Skim Revolusi Industri 4.0 serta Skim Pembangunan Perusahaan Kecil dan Sederhana di bawah PSMB.

Untuk makluman Yang Berhormat juga, Kerajaan telah membekukan pengambilan pekerja asing baharu mengambil kira penularan pandemik COVID-19 yang memberi implikasi besar kepada pasaran pekerjaan negara. Dalam tempoh ini, Kementerian Sumber Manusia sedaya upaya mengambil tindakan dalam memastikan pencari kerja tempatan diserap dalam pasaran pekerjaan bagi mengurangkan kadar pengangguran dan menjamin kelangsungan hidup rakyat khususnya yang terkesan akibat pandemik COVID-19. Pada masa yang sama, Kerajaan juga sedang meneliti pelbagai aspek dalam menambah baik pengurusan pengambilan pekerja asing secara holistik.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN FONG KUI LUN [BUKIT BINTANG]

TARIKH : 22 SEPTEMBER 2021 (RABU)

SOALAN

TUAN FONG KUI LUN minta **MENTERI KESIHATAN** menyatakan apakah tindakan untuk memberi vaksinasi yang penuh ke atas golongan yang alergik vaksin dan kanak-kanak yang tercicir dari program vaksinasi berbanding dengan golongan rakyat yang mendapat 2 dos vaksin.

JAWAPAN:

Tuan Yang di-Pertua,

1. Untuk makluman, KKM telah mengeluarkan Garis Panduan bertajuk *Clinical Guidelines on COVID-19 Vaccination in Malaysia*, Edisi 3 pada 1 Julai 2021 yang lalu. Berdasarkan garis panduan tersebut, bagi individu yang mempunyai sejarah alahan teruk apabila menerima vaksin sebelum ini, alahan teruk kepada pelbagai ubatan atau alahan teruk kepada ubatan atau alahan teruk kepada sesuatu yang tidak diketahui, individu tersebut perlu menjalani Penilaian pra-vaksinasi oleh pegawai atau pakar perubatan. Penilaian pra-vaksinasi adalah berdasarkan status kesihatan semasa, sejarah perubatan (*medical history*), sejarah alahan (*allergy history*) dan rawatan/ubatan yang sedang diterima oleh individu tersebut. Penilaian pra-vaksinasi dijalankan bagi tujuan berikut:

- (i) Menilai kesesuaian individu untuk menerima vaksin COVID-19;
- (ii) Menilai masa yang sesuai untuk individu tersebut menerima vaksin COVID-19; dan
- (iii) Menilai lokasi yang sesuai untuk individu tersebut menerima vaksin COVID-19, iaitu samada di hospital atau Pusat Pemberian Vaksin Awam.

2. Jika hasil penilaian mendapati individu tersebut tidak layak diberikan vaksin COVID-19, pengesahan pegawai atau pakar perubatan adalah diperlukan bagi membolehkan individu tersebut memperolehi Sijil Digital Vaksinasi COVID-19 Khas.

3. Bagi individu yang telah mengalami alahan teruk selepas menerima dos 1 vaksin COVID-19 jenis Pfizer dan Astrazeneca, individu tersebut akan diberikan vaksin Sinovac. Sekiranya individu tersebut masih mengalami alahan teruk selepas menerima Dos 1 vaksin Sinovac, vaksin COVID-19 dos tunggal seperti CanSino akan diberikan. Namun begitu, sekiranya individu tersebut masih mengalami alahan teruk selepas pemberian vaksin COVID-19 dos tunggal ataupun ketiadaan bekalan vaksin tunggal tersebut, tiada vaksin COVID-19 yang akan diberikan. Individu tersebut memerlukan pengesahan pegawai atau pakar perubatan

bagi membolehkan individu tersebut memperolehi Sijil Digital Vaksinasi COVID-19 Khas.

Tuan Yang di-Pertua,

4. Pada masa ini, semua penduduk Malaysia berusia 18 tahun dan ke atas layak menerima vaksin COVID-19. Bagi remaja berumur 12 hingga 17 tahun, hanya vaksin COVID-19 jenis Comirnaty (Pfizer-BioNTech) boleh diberikan. Pelaksanaan aktiviti imunisasi COVID-19 kepada golongan remaja ini akan dijalankan melalui program kesihatan sekolah, jangkauan luar (*out-reach*) dan di fasiliti kesihatan kerajaan dan swasta terpilih menggunakan vaksin yang telah diluluskan. Aktiviti ini dijangka akan dijalankan bermula bulan Oktober 2021 sehingga bulan Januari 2022.

5. Bagi kanak-kanak berumur di bawah 12 tahun, tiada vaksin COVID-19 yang telah diluluskan penggunaannya di Malaysia dan di seluruh dunia setakat ini. Namun begitu, sekiranya terdapat vaksin yang diluluskan untuk kanak-kanak berumur di bawah 12 tahun, keperluan untuk memperluaskan PICK di kalangan kumpulan tersebut akan melibatkan seramai 5.5 juta populasi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS TAHUN 2021**

PERTANYAAN : LISAN

**DARIPADA : DATUK MOHD. AZIS BIN JAMMAN
[SEPANGGAR]**

TARIKH : 22 SEPTEMBER 2021 [RABU]

SOALAN

minta **MENTERI PERUMAHAN DAN KERAJAAN TEMPATAN** menyatakan jumlah terkini rumah yang tidak terjual di seluruh Malaysia dan apakah mekanisme Kementerian bagi mengawal pemaju daripada membina projek perumahan yang tidak bertepatan dengan kehendak dan kemampuan rakyat secara berterusan.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Perumahan dan Kerajaan Tempatan (KPKT) memandang serius isu rumah tidak terjual. Isu ini berpunca daripada penawaran perumahan yang tidak sepadan dengan permintaan di sesuatu lokaliti, harga rumah yang tidak sepadan dengan pendapatan isi rumah, lokasi yang kurang menarik dan lain-lain lagi. Lambakan rumah tidak terjual ini akan menyebabkan berlaku kelembapan pasaran hartanah yang memberi impak kepada ekosistem pemajuan perumahan serta menjejaskan rantai ekonomi secara keseluruhan. Pada masa yang sama, transaksi pembelian rumah sedia ada secara *subsale* juga menyumbang kepada peningkatan rumah baharu yang tidak terjual.
2. Berdasarkan laporan Status Pasaran Harta Tanah oleh Pusat Maklumat Harta Tanah Negara (NAPIC), terdapat **27,468 unit** rumah siap dibina tidak terjual bernilai **RM18.48 bilion** dicatatkan pada suku pertama 2021 berbanding sebanyak **29,565 unit** rumah pada suku keempat tahun 2020 yang bernilai **RM18.91 bilion**. Ini menunjukkan terdapat penurunan sebanyak 7.1% dalam bilangan (S4 2020: 29,565 unit) dan 2.3% dalam nilai berbanding suku keempat tahun 2020 (S4 2020: RM18.92 bilion).
3. Walaupun terdapat peningkatan aktiviti pasaran, antaranya melalui Kempen Pemilikan Rumah (*Home Ownership Campaign*), pasaran harta tanah dijangka masih akan kekal perlahan sehingga akhir tahun 2021. Tahap peningkatan pasaran harta tanah ini bergantung kepada faktor domestik dan luaran seperti kenaikan harga bahan binaan, ketidaksepadanan penawaran dan permintaan (*supply and demand mismatch*), harga tanah yang melambung tinggi serta perkembangan pandemik COVID-19.

4. KPKT sedang menjalankan Kajian Analisis Data Raya (*Big Data Analytics*) Perumahan bagi mendapatkan gambaran sebenar kedudukan dan ketersediaan data berkaitan sektor perumahan di Malaysia di samping menetapkan keperluan pengguna (*user requirements*) sebelum pembangunan sistem yang berkenaan. Kajian ini juga bertujuan membantu ke arah mengatasi hartanah siap yang tidak terjual dan seterusnya berupaya untuk mengetahui kedudukan pasaran perumahan hartanah yang lebih jelas dan tepat demi pembangunan sektor hartanah yang lestari dan efisien. Kajian ini turut dijadikan input bagi pembangunan platform pusat pengumpulan data hartanah yang meliputi permintaan dan penawaran. Ia juga akan membantu pihak Kerajaan dalam membuat keputusan di peringkat Persekutuan dan Kerajaan Negeri dalam penyediaan dasar dan perancangan perumahan negara yang lebih komprehensif.

5. Kerajaan juga sedang mengkaji kemungkinan untuk memperkenalkan peraturan/garis panduan kepada para pemaju perumahan untuk mengemukakan kajian kebolehlaksanaan (*feasibility study*) semasa memohon Kebenaran Merancang (KM). Ini dapat membantu mengelak daripada berlakunya sebarang pembangunan perumahan yang tidak terancang dan akhirnya menyebabkan berlakunya masalah lebihan rumah yang tidak terjual.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN OSCAR LING CHAI YEW [SIBU]

TARIKH : 22 SEPTEMBER 2021 (RABU)

SOALAN

Minta **MENTERI KESIHATAN** menyatakan projek modular ICU yang akan dibina di Hospital Sibu, adakah projek ini masih aktif; ataupun dana projek itu boleh digunakan untuk menaik taraf ICU yang sedia ada untuk meningkatkan kapasitinya.

JAWAPAN

Tuan Yang di-Pertua,

1. Untuk makluman Yang Berhormat, Projek Modular Unit Rawatan Rapi (ICU) Hospital Sibul telah diluluskan peruntukan dan pelaksanaan secara perolehan darurat [Arahan Perbendaharaan (AP) 173.2]. Projek ini melibatkan aktiviti membina dan memasang Unit Rawatan Rapi Hibrid di Lapangan (FHylCU), Peralatan Perubatan dan Konsumabel dengan kos sebanyak RM6.6juta (RM6,603,225). Projek Modular ini dijangka siap sepenuhnya pada bulan September 2021.

2. Selain itu, Projek Naiktaraf Unit Rawatan Rapi Hospital Sibul telah diluluskan oleh Unit Perancang Ekonomi, Jabatan Perdana Menteri (UPE, JPM) di bawah *Rolling Plan* Keempat, Rancangan Malaysia Kesepuluh (RMKe-10) tahun 2014. Agensi Pelaksana bagi projek ini ialah Jabatan Kerja Raya Sarawak (JKR Sarawak). Walau bagaimanapun, pelaksanaan projek ini tertangguh di peringkat rekabentuk terperinci, berikutan ruang Unit Rawatan Rapi (ICU) sedia ada adalah terhad dan tidak memenuhi standard keperluan piawai ICU.

3. Bagi menghadapi pandemik COVID-19, Kementerian telah meluluskan peruntukan di bawah Butiran Projek, BP00600 (Naiktaraf, Ubah Suai dan Pembaikan) bagi Kerja-Kerja Naiktaraf Infrastruktur ICU di Hospital Sibul. Projek ini telah dimulakan pada 29 April 2021 dan dijangka siap sepenuhnya pada bulan September 2021. Projek ini dapat menambah bilangan katil ICU dari 13 katil kepada 30 katil, iaitu tambahan 17 katil.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG HON WAI
[BUKIT BENDERA]**

TARIKH : 22 SEPTEMBER 2021 (RABU)

SOALAN

Minta **MENTERI KESIHATAN** menyatakan sejajar dengan perkembangan terbaru, sama ada Kerajaan akan melaksanakan suntikan vaksin dos ke-3 untuk lawan COVID-19 untuk meningkatkan daya imuniti untuk rakyat Malaysia dan sama ada Kerajaan akan melaksanakan polisi suntikan vaksin COVID-19 wajib ke atas penjawat awam serta rakyat jelata.

JAWAPAN:

Tuan Yang di-Pertua,

1. YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19.
2. Keutamaan akan diberikan kepada kumpulan yang berisiko tinggi terlebih dahulu seperti anggota barisan hadapan kesihatan, pesakit kurang daya tahan imun (*immunocompromised*), warga tua dengan komorbiditi dan individu yang tinggal atau bekerja di pusat jagaan jangka panjang (*long-term care facilities*). Pemberian dos ketiga vaksin COVID- 19 akan dilaksanakan apabila liputan imunisasi populasi dewasa di seluruh negara melebihi 80%. Bagi tujuan tersebut, panel pakar perubatan dan kesihatan sedang membangunkan garis panduan pelaksanaan pemberian dos ketiga dan pada yang sama permohonan untuk mendapatkan kelulusan Pihak Berkuasa Kawalan Dadah sedang dilaksanakan.
3. Pemberian vaksin COVID-19 adalah masih secara sukarela dan pada masa ini Kerajaan tidak mempunyai perancangan untuk mewajibkan pengambilan vaksin COVID-19 ke atas penjawat awam serta rakyat jelata.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN R. SIVARASA [SUNGAI BULOH]

TARIKH : 22 SEPTEMBER 2021 (RABU)

SOALAN

TUAN R. SIVARASA [SUNGAI BULOH] minta **MENTERI KESIHATAN** menjelaskan berapa jumlah kakitangan Kementerian dan Kerajaan yang terlibat dalam kerja mengenal pasti kontak (contact tracing) dan untuk setiap bulan daripada November 2020 ke Ogos 2021, berapa kontak rapat yang telah dikenalpasti untuk kes-kes COVID-19 yang baru.

JAWAPAN

Tuan Yang di-Pertua,

1. Kerja mengenalpasti kontak rapat yang dilakukan di lapangan iaitu di Pejabat Kesihatan Daerah dilakukan oleh petugas kesihatan yang ditetapkan oleh Bilik Gerakan masing-masing. Setiap anggota kesihatan juga mempunyai tanggungjawab melakukan tugas lain seperti melakukan ujian saringan COVID-19, melakukan siasatan kes positif serta memasukkan data kes positif selain mengenalpasti kontak rapat. Tugas-tugas ini dilakukan secara bergilir-gilir sejak bermula pandemik COVID-19. Justeru, tiada angka khusus dapat dinyatakan berhubung berapa jumlah anggota yang terlibat dalam aktiviti pengesanan kontak rapat (contact tracing).

2. Sebagai contoh, pada 2 September 2021 sahaja, terdapat sejumlah 4,851 petugas yang menjalankan aktiviti pengesanan kontak rapat yang terdiri daripada 515 Pegawai Perubatan, 2,901 Penolong Pegawai Kesihatan Persekitaran, 1,138 orang daripada lain-lain penjawatan dan

297 orang sukarelawan di 160 buah Pejabat Kesihatan Daerah di seluruh Malaysia.

3. Jumlah saringan kontak rapat dalam kalangan kakitangan Kementerian dan Kerajaan dari 1 November 2020 sehingga 24 Ogos 2021 adalah sebanyak 739,429 kes. Perincian saringan kontak rapat bagi setiap bulan adalah seperti berikut:

- November 2020: 7,222 kes;
- Disember 2020: 10,338 kes;
- Januari 2021: 41,293 kes;
- Februari 2021: 26,372 kes;
- Mac 2021: 16,552 kes;
- April 2021: 29,626 kes;
- Mei 2021: 91,067 kes;
- Jun 2021: 89,309 kes;
- Julai 2021: 177,271 kes; dan
- Ogos 2021: 250,379 kes.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN GOBIND SINGH DEO [PUCHONG]

TARIKH : 22 SEPTEMBER 2021 (RABU)

SOALAN NO. 4

TUAN GOBIND SINGH DEO minta **MENTERI KESIHATAN** menyatakan apakah varian-varian terbaru COVID-19 dan adakah vaksin-vaksin yang sedia ada berkesan terhadap varian-varian baru ini. Sekiranya tidak, apakah langkah Kerajaan untuk mengatasi masalah ini.

JAWAPAN:

Tuan Yang di-Pertua,

1. Kementerian Kesihatan Malaysia (KKM) telah mengenalpasti kewujudan empat (4) *Variant of Concern* (VOC) COVID-19 iaitu varian Beta (B.1.351), varian Alpha (B.1.1.7) , varian Gamma (B.1.1.28) dan varian Delta (B.1.617.1). Daripada 10 Ogos 2021 sehingga 17 Ogos 2021, surveilan genomik oleh Institut Penyelidikan Perubatan (IMR) telah mengenal pasti sebanyak 43 kes varian baharu virus SARS-CoV-2 yang kesemuanya adalah *Variant of Concern* (VOC) iaitu varian Delta (B.1.617.2). Ini menjadikan jumlah kumulatif kes yang dijangkiti oleh virus SARS-CoV-2 yang dikategorikan sebagai VOC dan *Variant of Interest* (VOI) adalah sebanyak 710 kes. Daripada jumlah yang dikesan tersebut, 690 kes adalah VOC manakala 20 kes adalah VOI. Secara keseluruhan, sehingga kini, bagi VOC terdapat sebanyak 467 kes varian Delta, 209 kes varian Beta dan 14 kes varian Alpha manakala bagi VOI terdapat 13 kes varian Theta, empat (4) kes varian Kappa, dan tiga (3) kes varian Eta.

Tuan Yang di-Pertua,

2. Vaksin yang digunakan dalam Program Imunisasi COVID-19 Kebangsaan (PICK) mestilah memenuhi beberapa syarat iaitu:

(a) Kualiti

Kerajaan menerusi KKM akan membuat penilaian dari segi pengawalan bahan mentah dan proses pengilangan agar vaksin COVID-19 yang dihasilkan mengikut spesifikasi yang telah ditetapkan.

(b) Keberkesanan

Data-data kajian Vaksin COVID-19 tersebut haruslah berupaya untuk merangsang penghasilan antibodi yang mencukupi bagi melawan penyakit COVID-19.

(c) Keselamatan

Data-data kajian menunjukkan Vaksin COVID-19 tersebut tidak mempunyai kesan sampingan yang serius serta manfaat vaksin COVID-19 adalah melebihi daripada risiko-risiko yang diketahui.

3. Penilaian akan dibuat oleh Jawatankuasa Penilaian Produk Bahagian Regulatori Farmasi Negara (NPRA) untuk kelulusan dan Pihak Berkuasa Kawalan Dadah bagi tujuan pendaftaran sebelum ia didaftarkan dan boleh digunakan di Malaysia.

4. Buat masa ini, kesemua vaksin COVID-19 adalah didaftarkan secara pendaftaran bersyarat. Pendaftaran secara bersyarat memerlukan syarikat pemegang pendaftaran untuk mengemukakan analisis data tambahan dan terkini untuk dinilai Bahagian Regulatori Farmasi Negara (NPRA). Ia bagi memastikan keberkesanan dan keselamatan vaksin sentiasa dikemas kini dan perbandingan manfaat-risiko vaksin berkenaan kekal positif (*the benefits outweigh risks*).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN SYED SADDIQ B. SYED ABDUL
RAHMAN (MUAR)**

TARIKH : 22 SEPTEMBER 2021 (RABU)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI DALAM NEGERI** menyatakan jumlah dan status terkini semua siasatan terhadap semua ahli politik yang didakwa telah melanggar SOP sepanjang Perintah Kawalan Pergerakan dikenakan di seluruh negara. Antaranya dakwaan ahli politik di majlis makan beramai-ramai, makan dine-in di dalam premis kedai makan dan tidak memakai pelitup muka di tempat awam.

JAWAPAN

Tuan Yang Di Pertua,

Sepanjang tempoh Perintah Kawalan Pergerakan (PKP), mulai 18 Mac 2020 sehingga 25 Ogos 2021, seramai 56 orang ahli politik telah ditahan bersabit kesalahan berhubung pelanggaran *Standard Operating Procedure* (SOP). Daripada jumlah tersebut, sebanyak 22 kompaun telah dikeluarkan manakala 25 masih dalam tindakan siasatan, lapan (8) kes tiada tindakan lanjut (No Further Action – NFA) dan satu (1) kes telah dituduh di mahkamah.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN ISNARAISAH MUNIRAH MAJILIS
[KOTA BELUD]**

TARIKH : 22 SEPTEMBER 2021 (RABU)

SOALAN

PUAN ISNARAISAH MUNIRAH MAJILIS minta Menteri Kesihatan menyatakan perancangan Kementerian bagi menaik taraf fasiliti-fasiliti di Hospital Kota Belud serta menstrukturkan semula penempatan doktor-doktor pakar di seluruh negeri Sabah amnya dan Kota Belud khususnya.

JAWAPAN:

Tuan Yang di-Pertua,

1. Hospital Kota Belud merupakan Hospital Tanpa Pakar di daerah Kota Belud. Kementerian Kesihatan Malaysia (KKM) sentiasa berusaha menambah baik fasiliti dan meningkatkan perkhidmatan kesihatan di seluruh negara termasuk di Hospital Kota Belud. Sehubungan itu, dalam Rancangan Malaysia Ke-11, KKM telah melaksanakan beberapa projek naik taraf Hospital Kota Belud iaitu:

- (i) Pembinaan Bangunan Unit Kecemasan Dan Trauma pada tahun 2015 dengan kos RM2,500,000.00
- (ii) Pembinaan Stor HDU yang baru pada 2017 dengan kos RM200,000
- (iii) Pembaikan Bumbung Unit Hasil, OPD, Pengurusan dari tahun 2018 sehingga 2020 dengan kos sebanyak RM428,000.00

2. Bagi perancangan jangka masa panjang KKM bercadang untuk membina sebuah Blok Klinikal Baru Hospital Kota Belud yang merangkumi Wad Pesakit Dalam, Dewan Bedah, Dewan Bersalin, Makmal Patologi dan perkhidmatan sokongan yang lain. Cadangan projek ini akan diangkat di dalam Mesyuarat Semakan Permohonan Projek di peringkat KKM tertakluk kepada kemampuan kewangan kerajaan.

3. Bagi perkhidmatan kepakaran, penempatan pakar perubatan di sesebuah fasiliti yang diwartakan adalah antara lain, bergantung kepada jumlah kedatangan pesakit serta jenis perkhidmatan kepakaran yang ditawarkan.

4. KKM sentiasa menambah baik perkhidmatan kepada rakyat Malaysia dan untuk memperluaskan perkhidmatan kepakaran di fasiliti

luar bandar di Sabah khususnya, KKM melaksanakan inisiatif antaranya:

- (i) melaksanakan konsep hospital kluster melalui perkongsian kemudahan antara hospital bagi Pakar Perubatan dan Pegawai Perubatan menyampaikan rawatan kesihatan dalam lingkungan hospital-hospital yang diklusterkan; dan
- (ii) melaksanakan *visiting specialist* (dengan izin) bagi Pakar Perubatan menyampaikan rawatan kepada penduduk sekitar di luar bandar.

5. Penempatan pegawai perubatan dan pakar perubatan di negeri Sabah khususnya sentiasa diteliti dan ini dapat dilihat pada peningkatan jumlah penempatan doktor di negeri Sabah. Seramai 2,662 orang pegawai perubatan dan pakar perubatan telah ditempatkan di negeri Sabah pada tahun 2020 berbanding dengan 2,112 orang pada tahun 2014. Jumlah pakar perubatan pada tahun 2020 adalah seramai 375 orang berbanding dengan hanya 227 orang pada tahun 2014.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : TUAN SIVAKUMAR VARATHARAJU NAIDU
(BATU GAJAH)
TARIKH : 22 SEPTEMBER 2021 (RABU)

SOALAN

minta **MENTERI PERPADUAN NEGARA** menyatakan tentang pengagihan dana MITRA bagi tahun 2021 secara terperinci. Apakah pembaharuan- pembaharuan yang telah dibuat dalam pengagihan dana ini sebagai usaha mempertingkatkan kedudukan sosio-ekonomi kaum India.

JAWAPAN:

Tuan Yang Dipertua,

MITRA diperuntukkan Geran RM100 juta bagi Tahun 2021. Daripada jumlah tersebut, sebanyak **RM50,853,130.80** dibelanjakan untuk **pelunasan komitmen** tahun **2019** dan **2020**.

Baki sejumlah **RM49,146,869.13** adalah peruntukan sebenar untuk agihan program tahun **2021**.

Bil	Jumlah Peruntukan Mengikut Teras	Status Perbelanjaan Peruntukan MITRA Tahun 2021(selepas pelunasan komitmen 2019 dan 2020)			
		Jumlah Peruntukan(RM)	Pelunasan Komitmen (MITRA di bawah JPM) 2019 & 2020 (RM)	Baki Peruntukan Untuk Program 2021 (RM)	Jumlah Perbelanjaan Program 2021 (sehingga Ogos) (RM)
1	Modal Insan	35,227,936.00	20,197,566.05	15,030,369.95	666,484.60
2	Keusahawanan	23,500,000.00	9,804,658.20	13,695,341.80	1,165,260.00
3	Kesejahteraan Sosial	41,272,064.00	20,850,906.62	20,421,157.38	17,665,007.20
JUMLAH		100,000,000.00	50,853,130.87	49,146,869.13	19,496,751.80

Bil	Jumlah Peruntukan Mengikut Teras	Baki Peruntukan MITRA Untuk Program Tahun 2021		
		Baki Peruntukan Untuk Program 2021 (RM)	Jumlah Perbelanjaan Program 2021 (sehingga Ogos) (RM)	Baki Peruntukan 2021 (RM)
1	Modal Insan	15,030,369.95	666,484.60	14,363,885.35
2	Keusahawanan	13,695,341.80	1,165,260.00	12,530,081.80
3	Kesejahteraan Sosial	20,421,157.38	17,665,007.20	2,756,150.18
JUMLAH		49,146,869.13	19,496,751.80	29,650,117.33

PEMBAHARUAN YANG TELAH DIBUAT DALAM PENGAGIHAN DANA

1. KOTAK MITRA 2021

a. **Peruntukan sebanyak RM12,412,344.00** untuk pembekalan kotak makanan yang **akan memanfaatkan 90,000** keluarga Masyarakat India B40 yang miskin dan miskin tegar;

b. Sejumlah 34,298 kotak makanan telah diedarkan kepada keluarga Masyarakat India B40 di ladang, kawasan pinggir bandar dan bandar;

2. **MOBILISASI VAKSIN KOMUNITI (MOVAK)**

- a. Tumpuan di (30) lokasi merangkumi kawasan bandar, luar bandar dan ladang di (9) negeri yang mempunyai kadar kepadatan penduduk Masyarakat India yang tinggi iaitu Perak, Kedah, Selangor, Negeri Sembilan, Kelantan, Johor, Pahang, Perlis dan Terengganu;
- b. Merupakan kerjasama strategik dengan pihak Kementerian Kesihatan Malaysia (KKM), Kementerian Sains, Teknologi dan Inovasi (MOSTI) serta National Union of Plantation Workers (NUPW) untuk membantu pihak kerajaan meningkatkan kadar vaksinasi dikalangan Masyarakat India ;dan
- c. Telah dilaksanakan di **2 kawasan** pinggir bandar dan **1 ladang** di **Negeri Sembilan** serta **1 kawasan** pinggir bandar di **Kedah** dengan jumlah **1,862** dos suntikan vaksin.

3. **PENGEBUMIAN JENAZAH MASYARAKAT INDIA B40 COVID 19DI HOSPITAL KUALA LUMPUR (PUSARA)**

- a. **Peruntukan sebanyak RM500,000.00** untuk membayar kos perkhidmatan pengebumian jenazah Masyarakat India B40 COVID 19 yang tidak dituntut;
- b. Kos Maksima Pengebumian yang ditanggung adalah sebanyak RM3,000.00 bagi setiap jenazah yang dikendalikan secara bergilir oleh (18) buah syarikat pengebumian yang telah memenuhi syarat-syarat yang ditetapkan oleh Kementerian;
- c. Kos RM3,000.00 merangkumi kos keranda, van mayat, pakaian PPE, kos pembakaran mayat, bekas abu, kos dokumentasi dan kos pengurusan; dan
- d. Proses pengebumian dilaksanakan oleh syarikat pengebumian dengan persetujuan waris mendiang.

4. **PROJEK LEMBU TENUSU MITRA**

- a. **Peruntukan sebanyak RM5,199,600.00** yang melibatkan pemberian 4 (2+2) ekor lembu tenusu kacukan Fresian bunting dari Australia;
- b. Program ini dijayakan bersama dengan Jabatan Perkhidmatan Veterinar, Kementerian Pertanian dan Industri Makanan (MAFI);
- c. Pihak Jabatan Perkhidmatan Veterinar telah memberikan bantuan teknikal dari aspek penetapan kriteria dan syarat penternak serta kesesuaian baka lembu tenusu;
- d. Seramai 200 orang penternak kecil Masyarakat India B40 telah dikenalpasti untuk pelaksanaan *pilot project* daripada bilangan asal 600 penternak yang disasarkan; dan
- e. Pengagihan sedang dibuat di (6) negeri seperti berikut:

Bil	Negeri	Bil. Penternak
1	Johor	60
2	Perak	40
3	Selangor	30
4	Kedah	30
5	Negeri Sembilan	20
6	Melaka	20
Jumlah		200

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. HAJI DZULKEFLY BIN
AHMAD [KUALA SELANGOR]**

TARIKH : 22 SEPTEMBER 2021 (RABU)

SOALAN

Minta **MENTERI KESIHATAN** menyatakan bilakah Kementerian Kesihatan akan memaklumkan jumlah ujian genomik yang telah dilakukan oleh KKM dan kapasiti KKM membuat ujian ini.

JAWAPAN:

Tuan Yang di-Pertua,

1. Dalam usaha mengiatkan ketelusan data, keputusan ujian genomik COVID-19 telah dimuatnaik di laman sosial Kementerian Kesihatan Malaysia dan diterbitkan oleh pihak media serta sebagai kenyataan akhbar Ketua Pengarah Kesihatan daripada semasa ke semasa. Data ini termasuk jumlah ujian genomik yang dijalankan bagi setiap dua minggu, jumlah varian yang dikesan, dan pecahan mengikut negeri. Usaha ini telah dimulakan sejak keputusan ujian genomik dari kluster Sivagangga dimaklumkan pada tahun 2020.

2. Sehingga 26 Ogos 2021, KKM telah melakukan ujian genomik ke atas 779 kes. Berikut adalah perbandingan KKM dengan institusi lain di Malaysia dalam menghasilkan data genomik COVID-19. KKM melalui Institut Penyelidikan Perubatan (IMR) merangkumi 43% daripada jumlah data genomik yang dihasilkan sehingga kini, diikuti UNIMAS (34%), Universiti Malaya (UM) (12%), Malaysian Genome Institute (MGI) (10%) dan 1% dari institusi lain.

SOALAN NO : 74

3. Bagi mempertingkatkan kapasiti ujian genomik COVID-19, satu konsortium ditubuhkan yang melibatkan kerjasama KKM-MOSTI-KPT dan dilancarkan mulai Ogos 2021. Berikut adalah kapasiti ujian genomik di bawah Konsortium KKM-MOSTI-KPT sehingga 26 Ogos 2021.

Rajah 1: Kapasiti ujian genomik COVID-19 sehingga 26 Ogos 2021

No	Nama Institute	Tarikh Permulaan Survelan Genom di bawah Konsortium MOH-MOSTI-KPT	Kapasiti dua minggu sekali (sehingga 26 Ogos 2021)
1	Institute for Medical Research (IMR)	1 Ogos 2021	60
2	UNIMAS	1 Ogos 2021	200
3	UiTM	18 Ogos 2021	48
4.	TIDREC, UM	23 Ogos 2021	48
5.	Faculty of Medicine, UM	Akan bermula September 2021	-
6.	UMBI-UKM	24 Ogos 2021	48
7	Malaysian Genome Institute	Akan bermula September 2021	-
	Jumlah (untuk setiap dua minggu, sehingga 26 Ogos 2021)		404

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN TAN KOK WAI [CHERAS]

TARIKH : 22 SEPTEMBER 2021 (RABU)

SOALAN

TUAN TAN KOK WAI [CHERAS] minta **MENTERI DALAM NEGERI** menyatakan kadar kematian yang melibatkan kejadian memandu di bawah pengaruh alkohol dan dadah berbanding dengan kadar kematian akibat kategori kemalangan yang lain untuk tempoh lima (5) tahun yang lepas.

JAWAPAN

Tuan Yang Di Pertua,

Untuk tempoh antara tahun 2017 hingga 2021 (Januari hingga Julai), kadar **kematian** yang melibatkan kejadian memandu di bawah **pengaruh alkohol** dan **dadah** yang disiasat di bawah seksyen 44 Akta Pengangkutan Jalan 1987 adalah sebanyak **66 kes** berbanding dengan kadar kematian akibat kategori kemalangan yang lain, iaitu sebanyak **25,862 kes**.

Statistik perbandingan kemalangan jalan raya bermula tahun 2017 hingga tahun 2021 (Januari hingga Julai) yang melibatkan memandu/menunggang di bawah pengaruh alkohol dan dadah adalah seperti di **Jadual 1** berikut:

Jadual 1

TAHUN	BIL. KES KEMATIAN (SEKSYEN 41 APJ 1987)	BIL. KES KEMATIAN AKIBAT PEMANDUAN DI BAWAH PENGARUH ALKOHOL DAN DADAH (SEKSYEN 44 APJ 1987)
2017	6,381	7
2018	6,171	11
2019	6,098	9
2020	4,652	28
2021 (JAN – JULAI)	2,560	11
JUMLAH	25,862	66

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 22 SEPTEMBER 2021 (RABU)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI KESIHATAN** menyatakan adakah Malaysia berniat untuk melaksanakan program pemberian vaksin dos ketiga ('booster shot'), dan adakah program vaksinasi ini juga akan diperluas kepada kumpulan di bawah umur 18 tahun.

JAWAPAN

Tuan Yang di-Pertua,

1. YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19.
2. Keutamaan akan diberikan kepada kumpulan yang berisiko tinggi terlebih dahulu seperti anggota barisan hadapan kesihatan, pesakit kurang daya tahan imun (*immunocompromised*), warga tua dengan komorbiditi dan individu yang tinggal atau bekerja di pusat jagaan jangka panjang (*long-term care facilities*). Pemberian dos ketiga vaksin COVID-19 akan dilaksanakan apabila liputan imunisasi populasi dewasa di seluruh negara melebihi 80%. Bagi tujuan tersebut, panel pakar perubatan dan kesihatan sedang membangunkan garis panduan

pelaksanaan pemberian dos ketiga dan pada yang sama permohonan untuk mendapatkan kelulusan Pihak Berkuasa Kawalan Dadah sedang dilaksanakan.

3. Bagi pogram vaksinasi kepada anak-anak berumur 18 tahun ke bawah, Program Imunisasi Covid-19 Kebangsaan Remaja (PICK-Remaja) ini menyasarkan 3.2 juta remaja berumur 12 hingga 17 tahun. Sehingga 20 September, kelulusan pemberian vaksin COVID-19 adalah kepada semua remaja yang genap berusia 12 tahun mengikut tarikh lahir hingga 17 tahun sahaja layak menerima vaksin COVID-19 pada tahun ini.

4. Program ini telah dimulakan di Sarawak pada 8 September 2021 dan Wilayah Persekutuan Labuan pada 11 September 2021 memandangkan kedua-dua negeri telah mencapai 80% liputan imunisasi COVID-19 dalam kalangan dewasa. Bagi negeri-negeri lain, program telah dimulakan seawal 15 September 2021. Keutamaan diberikan kepada remaja berumur 16 dan 17 tahun dan seterusnya akan diperluaskan kepada remaja berumur 12 hingga 15 tahun.

5. Pada 20 September 2021, ***Kick-Off*** Program Imunisasi COVID-19 Kebangsaan remaja (PICK Remaja) telah dilaksanakan di Sekolah Menengah Kebangsaan Putrajaya Presint 8 (1) - SMK Putrajaya Presint 8 (1).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN CHOW KON YEOW
[TANJONG]**

TARIKH : 22 SEPTEMBER 2021 (RABU)

SOALAN

TUAN CHOW KON YEOW [TANJONG] minta **MENTERI KESIHATAN** menyatakan sama ada Program Imunisasi COVID-19 Kebangsaan (PICK) bagi suntikan ketiga akan dilaksanakan. Jika ya, apakah pelan pelaksanaannya. Perincikan penjadualan agihan mengikut negeri berserta jenis vaksin yang bakal terlibat.

JAWAPAN

Tuan Yang di-Pertua,

1. YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19.
2. Keutamaan akan diberikan kepada kumpulan yang berisiko tinggi terlebih dahulu seperti anggota barisan hadapan kesihatan, pesakit kurang daya tahan imun (*immunocompromised*), warga tua dengan komorbiditi dan individu yang tinggal atau bekerja di pusat jagaan jangka panjang (*long-term care facilities*). Pemberian dos ketiga vaksin COVID-19 akan dilaksanakan apabila liputan imunisasi populasi dewasa di seluruh negara melebihi 80%. Bagi tujuan tersebut, panel pakar perubatan dan kesihatan sedang membangunkan garis panduan pelaksanaan pemberian dos ketiga dan pada yang sama permohonan untuk mendapatkan kelulusan Pihak Berkuasa Kawalan Dadah sedang dilaksanakan.
3. Penjadualan serta agihan vaksin kepada negeri-negeri adalah berdasarkan kepada bilangan penerima di setiap negeri berdasarkan data-data sedia ada daripada aplikasi MySejahtera atau data manual.

Sekian, terima kasih.